



Comisiwn
y Gyfraith

Diwygio'r gyfraith

Apeliadau Troseddol

Crynodeb o'r Papur Ymgynghori

Y Crynodeb

Bwriad y crynodeb hwn yw rhoi trosolwg o'r materion allweddol rydym yn eu trafod yn ein papur ymgynghori Apeliadau Troseddol. Mae'n egluro beth yw pwrpas y prosiect a'r materion rydym yn rhoi sylw iddynt.

Yn y papur ymgynghori, rydym yn nodi nifer o gwestiynau ymgynghori rydym yn gofyn am ymatebion iddynt. Rydym yn cyfeirio at y cwestiynau ymgynghori hyn drwy gydol y crynodeb hwn pan fyddwn yn gofyn 29 o "gwestiynau ymgynghori cryno". Mae rhai cwestiynau'n nodi cynigion dros dro ar gyfer diwygio'r gyfraith ac yn gofyn a ydych chi'n cytuno ai peidio. Mae eraill yn gwestiynau agored lle byddwn yn gofyn am eich barn. Dim ond ar ôl i ni dderbyn ac ystyried yr holl ymatebion i'r papur ymgynghori y byddwn yn dod i'n casgliadau terfynol ac yn gwneud argymhellion ar gyfer diwygio.

Ein nod yw sicrhau bod unrhyw un yn gallu darllen y crynodeb hwn ac ymgysylltu â'r materion allweddol rydym yn rhoi sylw iddynt. Gallai hyn fod yn arbennig o ddefnyddiol i aelodau o'r cyhoedd sydd â llai o ddiddordeb mewn ymgysylltu â'r materion mwy manwl yn y papur ymgynghori llawn.

Os oes gan unigolion neu sefydliadau ddiddordeb neu arbenigedd penodol mewn unrhyw un neu bob un o'r meysydd rydym yn eu harchwilio, yna byddem yn eu hannog i ddarllen y papur ymgynghori llawn. Mae'n cynnwys trafodaeth fanylach ar y materion.



Pwy ydym ni 	Mae Comisiwn y Gyfraith yng Nghymru a Lloegr yn gorff annibynnol a sefydlwyd drwy statud i wneud argymhellion i'r Llywodraeth ynglŷn â diwygio'r gyfraith yng Nghymru a Lloegr.
Am beth mae'n sôn? 	Mae Comisiwn y Gyfraith yn cynnal adolygiad o'r gyfraith sy'n llywodraethu apeliadau mewn achosion troseddol ac yn ystyried yr angen am ddiwygio gyda golwg ar sicrhau bod gan y llysoedd bwerau sy'n galluogi'r broses effeithiol, effeithlon a phriodol o ddatrys apeliadau. Bydd yr adolygiad yn rhoi sylw arbennig i anghysondebau, ansicrwydd a bylchau yn y gyfraith.
Pam rydym yn ymgynghori? 	Rydym yn gofyn am farn ynghylch a oes angen diwygio'r gyfraith, a sut. Mae ymgynghori yn elfen hollbwysig o'n gwaith. Rydym am i unrhyw argymhellion a wnawn yn y pen draw gael sylfaen dystiolaeth mor gryf â phosibl.
Gan bwy rydym yn dymuno clywed? 	Hoffem glywed gan gynifer o randdeiliaid â phosibl sydd â phrofiad o'r broses apeliadau troseddol, gan gynnwys gweithwyr cyfreithiol proffesiynol, barnwyr, academyddion ac ymchwilwyr, a sefydliadau sy'n cynnig cymorth i bobl sydd, neu sy'n honni eu bod, wedi dioddef camweinyddiad cyfiawnder. Rydym yn awyddus hefyd i gael ymatebion gan bobl sydd wedi ceisio apelio, neu sydd wrthi'n apelio ar hyn o bryd, yn erbyn eu heuogfarn neu eu dedfryd. Fodd bynnag, ni allwn gymryd rhan mewn achosion neu apeliadau unigol.
Ble allaf ddarllen y papur ymgynghori? 	Mae'r papur ymgynghori llawn ar gael ar ein gwefan, yn ogystal â fersiynau Cymraeg, hawdd eu deall, a sain o'r crynodeb: www.lawcom.gov.uk/project/criminal-appeals/

Beth yw'r dyddiad cau? 	Y dyddiad cau ar gyfer ymatebion yw 27 Mehefin 2025.
Sut i ymateb? 	Os ydych chi'n ymateb i'r papur ymgynghori llawn, byddem yn gwerthfawrogi ymatebion drwy ddefnyddio'r ffurflen ymateb ar-lein sydd ar gael yn: https://consult.justice.gov.uk/law-commission/criminalappeals Os ydych chi'n ymateb i'r cwestiynau yn y crynodeb hwn, byddem yn gwerthfawrogi ymatebion drwy ddefnyddio'r ffurflen ymateb ar-lein sydd ar gael yn: https://consult.justice.gov.uk/law-commission/criminalappealssummary/ Fel arall, gallwch ymateb: drwy e-bost at criminal.appeals@lawcommission.gov.uk drwy'r post at: Criminal Appeals Team, Law Commission, 1st Floor, 52 Queen Anne's Gate, London, SW1H 9AG (Os byddwch chi'n anfon eich sylwadau drwy'r post, byddai'n fuddiol pe gallech eu hanfon yn electronig hefyd os oes modd i chi wneud hynny.) Rydym yn fodlon darparu ffurflen wedi'i hargraffu er mwyn gallu cyflwyno ymatebion ysgrifenedig i'r cwestiynau yn y crynodeb hwn i'r rhai nad ydynt yn gallu ymateb yn electronig. Gofynnwch am "ffurflen ymateb i apeliadau" gan ddefnyddio'r cyfeiriad neu'r cyfeiriad e-bost uchod.
Beth fydd yn digwydd nesaf? 	Ar ôl dadansoddi pob ymateb, byddwn yn gwneud argymhellion dros ddiwygio, a byddwn yn cyhoeddi'r rheini mewn adroddiad. Y Llywodraeth fydd yn penderfynu a fydd yn gweithredu'r argymhellion. I gael rhagor o wybodaeth am y modd y mae Comisiwn y Gyfraith yn cynnal ei ymgynghoriadau, a'n polisi ar gyfrinachedd a sicrhau bod ymatebion ymgynghoreion yn aros yn anhysbys, ewch i'r papur ymgynghoriad.

Cyflwyniad

Gall y sawl sydd wedi'i gael yn euog o drosedd geisio herio naill ai ei euogfarn neu ei ddedfryd drwy apêl.

Mae gan apeliadau swyddogaeth bwysig i unigolion, boed hynny i gywiro camweinyddiad cyfiawnder, fel euogfarn rhywun sy'n ddiheuog, neu gywiro gwall cyfreithiol, fel rhoi dedfryd fwy llym na'r hyn a ganiateir yn ôl y gyfraith.

Fodd bynnag, maent hefyd yn cyflawni swyddogaethau cyhoeddus pwysig, wrth sicrhau bod cyfraith trosedd yn cael ei dehongli a'i chymhwyso'n gyson ac yn rhagweladwy, ac wrth ddatblygu'r gyfraith gwlad.

Ym mis Gorffennaf 2022, gofynnodd y Llywodraeth i Gomisiwn y Gyfraith gynnal adolygiad o'r gyfraith sy'n ymwneud ag apeliadau troseddol. Mae'r cylch gorchwyl ar gyfer y prosiect hwn yn mynnu ein bod yn ystyried yr angen i ddiwygio'r gyfraith, gyda'r bwriad o sicrhau bod gan lysoedd bwerau sy'n galluogi datrys apeliadau'n effeithiol, yn effeithlon ac yn briodol. Mae hyn yn cynnwys ystyried a oes tystiolaeth bod y profion cyfreithiol a ddefnyddir yn y Llys Apêl a gan y Comisiwn Adolygu Achosion Troseddol yn llesteirio'r broses o gywiro camweinyddiad cyfiawnder, ac a yw'r trefniadau presennol ar gyfer apeliadau o'r llys ynadon yn ddefnydd effeithlon ac effeithiol o adnoddau'r llys ac amser barnwrol. Ddiwedd 2024, cytunodd Comisiwn y Gyfraith a'r Llywodraeth y byddem hefyd yn ystyried y gyfraith sy'n rheoli iawndal ar gyfer dioddefwyr camweinyddiad cyfiawnder.

Ym mis Gorffennaf 2023, fe wnaethom gyhoeddi Papur Materion â 167 o dudalennau, lle roeddem wedi gofyn 18 cwestiwn i gwmpasu meysydd ar gyfer diwygio posibl mewn apeliadau troseddol a safbwyntiau amodol ymatebwyr arnynt. Cawsom dros 150 o ymatebion i'r papur, gan gynnwys gan garcharorion sy'n bwrw dedfryd, cyrff y wladwriaeth fel Gwasanaeth Eryl y Goron (CPS), cyfreithwyr unigol, academyddion ac ymgyrchwyr, cyrff proffesiynol fel Cymdeithas y Gyfraith, Cyngor y Bar a Chymdeithas y Cyfreithwyr Troseddau, yn ogystal ag elusennau a grwpiau fel APPEAL, y Centre for Women's Justice a JENGbA (Joint Enterprise Not Guilty by Association). Mae'r ymatebion wedi cyfrannu'n uniongyrchol at lunio ein papur ymgynghori.



Cefndir

Mae dau wahaniaeth yn allweddol i ddeall y system apeliadau troseddol modern.

Yn gyntaf, mae'r gweithdrefnau ar gyfer apeliadau'n adlewyrchu'r rhaniad rhwng achosion "diannod", mewn achosion llai difrifol neu lai cymhleth, a dreialwyd gan ynadon neu farnwyr rhanbarth, a threial "trwy dditiad" gerbron barnwr a rheithgor yn Llys y Goron. Gall troseddau fod yn rhai "diannod yn unig", yn "dditiadwy yn unig", neu'n droseddau "neillffordd". Gellir erlyn troseddau neillffordd naill ai mewn achosion diannod neu drwy dditiad, ond mae gan y diffynnydd yr hawl i ddewis cael ei erlyn gan reithgor yn Llys y Goron.

Yn ail, yn hanesyddol, mae'r system apeliadau wedi ffafrio apeliadau ar bwyntiau cyfreithiol yn hytrach nag apeliadau ar bwyntiau ffeithiol (mewn geiriau eraill, dadleuon bod y gyfraith wedi'i chymhwyso'n anghywir neu nad oedd yn gwneud yr ymddygiad dan sylw yn droseddol o'i gymharu â dadleuon bod tyst yn anghywir neu fod tystiolaeth wedi'i chamddeall). Mae hyn oherwydd yr egwyddor mai proses treial yw'r mecanwaith gorau ar gyfer sefydlu ffeithiau, a bod apeliadau yn bennaf ar gyfer adolygu achos, yn hytrach nag ar gyfer ail-wrandawriad.

Yn y flwyddyn a ddaeth i ben ym mis Mehefin 2024, cafwyd 1,096,074 o bobl yn euog mewn llysoedd ynadon a 53,537 yn Llys y Goron.¹ Dim ond lleiafrif bach o euogfarnau a'r dedfrydau sy'n eu dilyn fydd yn cael eu herio neu'n destun apelio yn eu herbyn.

Gellir dwyn apeliadau yn erbyn euogfarnau, dedfrydau neu'r ddau. Mae apeliadau llwyddiannus yn erbyn euogfarn yn arwain at euogfarn yn cael ei "diddymu" (hynny yw, mae'r apelydd, sef y sawl wnaeth ddwyn

yr apêl, yn ei gael yn ddieuog o'r drosedd). Mewn rhai amgylchiadau, gall y llys orchymyn ail dreial neu gyfnewid euogfarn am drosedd lai. Gall apeliadau llwyddiannus yn erbyn dedfryd arwain at y llys yn newid dedfryd ar sail camgymeriadau yn y ddedfryd wreiddiol neu ffactorau sydd wedi dod i'r amlwg wedyn.


Yn gyffredinol, gellir apelio yn erbyn achosion llys ynadon i Lys y Goron neu (ar bwynt cyfreithiol) i'r Uchel Lys, ac achosion Llys y Goron i Adran Droseddol y Llys Apêl. Gellir apelio ymhellach i'r Goruchaf Lys yn erbyn apeliadau i'r Uchel Lys a'r Adran Droseddol y Llys Apêl ar bwynt cyfreithiol o bwysigrwydd cyhoeddus cyffredinol. Mae cyfyngiadau amser llym ar gyfer dwyn apeliadau, ond gellir caniatáu estyniadau, ac mae pob apêl ac eithrio apeliadau mewn amser i Lys y Goron yn gofyn am ganiatâd cyn y gall y llys apêl ystyried yr apêl.

Y brif ddeddfwriaeth sy'n rheoli apeliadau troseddol yw Deddf Llysoedd Ynadon 1980 (ar gyfer apeliadau o lysoedd ynadon), Deddfau Apeliadau Troseddol 1968 a 1995 (ar gyfer apeliadau i'r Adran Droseddol y Llys Apêl), a Deddf Uwchlysoedd 1981 (ar gyfer y ddau).

*** Nid yw'r diagram hwn yn gynhwysfawr ac nid yw'n sôn am ofynion ar gyfer caniatâd nac estyniadau amser. Gellir rhoi rhai troseddau diannod yn unig ar brawf gyda rhai ditiadwy yn Llys y Goron, ond bydd apeliadau yn erbyn y troseddau hyn yn mynd i Adran Droseddol y Llys Apêl. Ar wahân, os ceir person yn euog mewn llys ynadon, gellir ei draddodi (anfon) i'w ddedfrydu gan farnwr yn Llys y Goron; dan yr amgylchiadau hynny, bydd apêl yn erbyn euogfarn yn mynd i Lys y Goron ond bydd apêl yn erbyn dedfryd yn mynd i'r Adran Droseddol y Llys Apêl.**

¹ Y Weinyddiaeth Gyfiawnder, Ystadegau Chwarterol Cyfiawnder Troseddol: Y flwyddyn a ddaeth i ben ym mis Mehefin 2024.

Llwybrau apelio: diffynnyddion yn apelio yn erbyn euogfarn neu ddedfryd*



Yn hanesyddol, prif sbardun diwygio apeliadau troseddol fu pryder ynghylch camweinyddiad cyfiawnder ac anallu canfyddedig y system cyfiawnder troseddol i'w hosgoi neu fynd i'r afael â nhw'n ddigonol. Roedd y Comisiwn Brenhinol ar Gyfiawnder Troseddol yn dilyn y dicter ynghylch y degawdau a gymerodd i wrthdroi euogfarnau anghyfiawn Pedwar Guildford, Chwech Birmingham ac eraill. Arweiniodd at Ddeddf Apêl Droseddol 1995, a greodd y Comisiwn Adolygu Achosion Troseddol, corff a sefydlwyd yn bennaf i ail-archwilio a chyfeirio achosion a apeliwyd yn aflwyddiannus yn ôl i'r llys apêl perthnasol.

Yn gyffredinol, mae'r Comisiwn Adolygu Achosion Troseddol a'r system apelio wedi cael eu beirniadu dros y blynyddoedd diwethaf, drwy adroddiadau gan Bwyllgor Cyfiawnder Tŷ'r Cyffredin yn 2015 a'r Grŵp Seneddol Hollbleidiol ar Gamweinyddiadau Cyfiawnder yn 2021. Mynegwyd pryder cyhoeddus hefyd yn dilyn euogfarnau anghyfiawn is-bostfeistri a erlynwyd gan Swyddfa'r Post, a methiannau awdurdodau cyhoeddus ynghylch achos Andrew Malkinson, a dreuliodd 17 mlynedd yn y carchar yn dilyn ei euogfarn anghyfiawn am dreisio.

Sgandal Horizon Swyddfa'r Post

Rhwng 1999 a 2015, cafodd cannoedd o is-bostfeistri Swyddfa'r Post a gweithwyr eraill eu herlyn am ddwyn, twyll, ffug gyfrifyddu a throseddau anonestrwydd eraill, yn seiliedig ar ddiffygion a ganfuwyd gan feddalwedd cyfrifyddu Horizon.

Yn 2009, dywedodd cylchgrawn *Computer Weekly* bod honiadau bod Swyddfa'r Post wedi methu â chydabod problem bosibl gyda Thechnoleg Gwybodaeth. Yn dilyn

hyn, roedd Alan Bates wedi sefydlu'r Gynghrair Cyfiawnder i Is-bostfeistri. Ni chafodd ei erlyn oherwydd diffygion Horizon ond terfynwyd ei gontract ym mis Tachwedd 2003 yng nghydestun y rhain.

Roedd 555 o is-bostfeistri wedi erlyn Swyddfa'r Post yn achos *Bates v Post Office Ltd*. Dyfarnwyd bod contractau Swyddfa'r Post â'r is-bostfeistri wedi bod yn annheg a bod Horizon yn cynnwys chwilod, gwallau a diffygion.

Sefydlodd y Llywodraeth Ymchwiliad TG Horizon Swyddfa'r Post yn 2020 i ymchwilio i weithrediad a methiannau system TG Horizon yn Swyddfa'r Post.

Yn y cyfamser, heriodd is-bostfeistri (neu eu teuluoedd, i'r rhai a oedd wedi marw) eu heuogfarnau drwy'r Comisiwn Adolygu Achosion Troseddol ac apeliadau rheolaidd, gan ddechrau gyda'r 39 apelydd o 42 yn *Hamilton v Post Office Ltd* y cafodd eu heuogfarnau eu dileu gan yr Adran Droseddol y Llys Apêl yn 2021.

Fodd bynnag, arweiniodd dicter eang ymysg y cyhoedd at basio Deddf Troseddau Swyddfa'r Post (System Horizon) 2024 ar 24 Mai 2024, a oedd, bron yn ddigynsail, yn diddymu euogfarnau cannoedd yn rhagor o is-bostfeistri a oedd yn bodloni meini prawf penodol.

Egwyddorion

Mae nifer o egwyddorion craidd, rhai'n gyffredin i'r system cyfiawnder troseddol gyfan, eraill sy'n unigryw i apeliadau, sy'n llywio apeliadau troseddol, diwygio a'n papur ymgynghori. Bydd bron pob penderfyniad a rheol cyfraith sy'n ymwneud ag apeliadau yn golygu cydbwyso gwahanol egwyddorion, nad ydynt yn aml yn pwyntio at yr un cyfeiriad.

Mae rhyddfarnu'r dieuog a cholffarnu'r euog yn brif nodau'r system cyfiawnder troseddol. Er bod euogfarn anghyfiawn y sawl sy'n ddieuog yn cael ei gydnabod fel camweinyddiad cyfiawnder, gall hefyd fod yn gamweinyddiad cyfiawnder os na fydd pobl sy'n cyflawni troseddau yn cael eu cosbi ac na fydd dioddefwyr yn cael eu diogelu. Mae llawer o agweddau ar achos troseddol yn adlewyrchu'r egwyddor a dderbynnir yn gyffredinol ei bod yn well rhyddfarnu'r euog na pheryglu cael rhywun dieuog yn euog.

Gall yr egwyddorion hyn wrthdaro â'r angen am derfynoldeb mewn achosion cyfreithiol: dylai dioddefwyr, y cyhoedd a'r bobl a gafwyd yn euog eu hunain fod â rhywfaint o sicrwydd bod achosion troseddol penodol yn cael eu cwblhau ac na fyddant yn cael eu hailystyried. Serch hynny, cydnabyddir yn gyffredinol ei bod yn bwysicach na ddylai rhywun dieuog barhau i fod wedi'i ddyfarnu'n euog o drosedd nad oedd wedi'i gyflawni, hyd yn oed os daw'r seiliau dros gamweithredu'r euogfarn i'r amlwg fisoedd, blynyddoedd neu ddegawdau ar ôl yr euogfarn.

O dan erthygl 6 o'r Confensiwn Ewropeaidd ar Hawliau Dynol, mae gan bawb yr hawl i dreial teg, ac o dan y Cyfamod Rhyngwladol ar Hawliau Sifil a Gwleidyddol, mae gan bob unigolyn a gafwyd yn euog yr hawl i gael adolygiad o'u heuogfarn a/neu eu dedfryd gan gorff uwch. Mae'r rhain yn ategu egwyddorion tegwch ac uniondeb y system gyfreithiol (ymhlith pethau eraill o ran

gallu cywiro ei gamweddau) mewn cyfraith gyffredin. Yn nhreialon Llys y Goron, mae goruchafiaeth y rheithgor a pharch y llysoedd at ei euogfarnau hefyd wedi hen ennill eu plwyf mewn cyfraith gyffredin.

Mae rhai rhannau o'r system apeliadau troseddol yn adlewyrchu'r egwyddor na ddylai unigolyn fod mewn perygl o gael mwy o gosb o ganlyniad i gyflwyno apêl (yr egwyddor "dim mwy o gosb"). Glynir wrth yr egwyddor hon mewn rhai rhannau o'r system apeliadau troseddol, ond nid mewn rhannau eraill. Os nad yw, gallai'r posibilrwydd o ddedfryd uwch atal apeliadau teilwng ac atal mynediad at gyfiawnder.

Cwestiwn Cryno 1:

Ydych chi'n cytuno mai egwyddorion perthnasol y system apeliadau troseddol yw:

1. rhyddfarnu'r dieuog;
2. collfarnu'r euog;
3. tegwch;
4. cydnabod rôl y rheithgor mewn treialon ar dditiad;
5. cynnal uniondeb y system cyfiawnder troseddol;
6. sicrhau mynediad at gyfiawnder (gan gynnwys yr egwyddor "dim mwy o gosb", ac ystyried anghenion grwpiau penodol); a
7. terfynoldeb?

Cwestiwn Cryno 2:

Ydych chi'n cytuno, mewn egwyddor, na ddylai unigolyn fod mewn perygl o gael ei ddedfryd wedi'i chynyddu o ganlyniad i'w ymgais i apelio yn erbyn ei euogfarn neu ei ddedfryd?

Euogfarn anghyfiawn Andrew Malkinson

Ar 19 Gorffennaf 2003, cafodd menyw ei thagu i'r pwynt o fod yn anymwybodol, ei niweidio'n ddifrifol a'i threisio yn Salford.

Arestiodd Andrew Malkinson gan Heddlu Manceinion Fwyaf ar 2 Awst 2003 oherwydd y tybiwyd bod tebygrwydd rhyngddo ef a disgrifiad o'r ymosodwr. Fe wnaeth y dioddefwr ei ddewis mewn parêd adnabod.

Cafodd ei gyhuddo o ymgais i lofruddio, treisio a cheisio tagu, ac roedd yr achos yn dibynnu'n drwm ar dystiolaeth adnabod y dioddefwr, a hefyd dau dyst a ddywedodd fod Mr Malkinson gerllaw ar adeg y trosedd (roedd gan y ddau ohonynt euogfarnau am anonestrwydd). Roedd achos yr amddiffyniad yn un o gamadnabod. Cafwyd Mr Malkinson yn euog o ymgais i dagu a dau achos o dreisio ar 10 Chwefror 2004 a chafodd ei ddedfrydu i garchar am oes gyda chyfnod sylfaenol o chwe blynedd a 125 diwrnod ar 30 Mawrth 2004.

Apeliodd Mr Malkinson yn erbyn ei euogfarnau, ond gwrthodwyd ei apel yn 2006. Yn 2007, roedd prawf DNA o grys y dioddefwr wedi canfod DNA mewn lleoliad a oedd yn benodol i'r trosedd, nad oedd wedi dod gan Mr Malkinson na chariad y dioddefwr. Gwnaeth Mr Malkinson gais i'r Comisiwn Adolygu Achosion Troseddol i gyfeirio ei achos

yn 2009. Gwrthododd ei gais yn 2012, ac ail gais yn 2020.

Ni chafodd Mr Malkinson ei ryddhau o'r carchar tan fis Rhagfyr 2020, ar ôl 17 mlynedd dan glo. Yn dilyn trydydd cais, cyfeiriodd y Comisiwn Adolygu Achosion Troseddol euogfarnau Mr Malkinson i Adran Droseddol y Llys Apêl, a'u diddymodd ar 23 Gorffennaf 2023. Yn ogystal â'r dystiolaeth DNA, penderfynodd y Llys fod yr euogfarnau yn anniogel ar sail y methiant i ddatgelu llun a oedd yn tanseilio adnabyddiaeth y dioddefwr o Mr Malkinson ac euogfarnau blaenorol y llygad-dystion tybiedig.

Comisiynodd y Comisiwn Adolygu Achosion Troseddol adolygiad o'r ffordd yr ymdriniwyd â'r achos gan Chris Henley CB, a oedd yn feirniadol iawn o fethiant mynych y Comisiwn Adolygu Achosion Troseddol i nodi perthnasedd y dystiolaeth DNA newydd. Mae ymchwiliad, a orchynnwyd gan y Llywodraeth, gan Ei Hanrhydedd y Barnwr Sarah Munro, sy'n archwilio gweithredoedd y Comisiwn Adolygu Achosion Troseddol, Heddlu Manceinion Fwyaf a'r erlyniad, yn parhau.

Tynnodd rhyddfarn Mr Malkinson sylw'r cyhoedd hefyd at y cyfyngiadau ar iawndal i unigolyn sy'n dioddef camweinyddiad cyfiawnder.

Apeliadau'r sawl a gafwyd yn euog i'r Adran Droseddol y Llys Apêl

Rhaid i'r sawl a geir yn euog neu a ddedfrydwyd yn Llys y Goron wneud cais am ganiatâd i apelio yn erbyn ei euogfarn a/neu ei ddedfryd i'r Adran Droseddol y Llys Apêl cyn penderfynu ar yr apêl. (Gall barnwr y treial neu'r barnwr sy'n dedfrydu ardystio bod achos yn addas ar gyfer apêl, ond anaml y gwneir hyn.) Fel arfer, bydd ceisiadau am ganiatâd yn cael eu penderfynu gan un barnwr o Adran Droseddol y Llys Apêl (barnwr o'r Uchel Lys fel arfer): y prawf yw a yw'r apêl yn "un y gellir ei dadlau". Os rhoddir caniatâd, anfonir yr apêl i'w phenderfynu gan y "llys llawn" (gweler isod).

Os nad yw'n gwneud cais am ganiatâd o fewn 28 diwrnod i'r penderfyniad y mae'n dymuno ei herio, rhaid i'r sawl a gafwyd yn euog wneud cais am estyniad amser gan Adran Droseddol y Llys Apêl. Mae hyn yn golygu, er mwyn gwneud cais am ganiatâd i apelio yn erbyn euogfarn, bod yn rhaid i'r sawl a gafwyd yn euog wneud cais o fewn 28 diwrnod i osgoi'r angen am estyniad amser, hyd yn oed os nad yw wedi'i ddedfrydu eto. Ymdrinnir â'r rhan fwyaf o geisiadau am estyniadau amser gan un barnwr.

Gall y barnwr unigol neu'r Cofrestrydd Apeliadau Troseddol hefyd gyfeirio cais i'r llys llawn i wneud penderfyniad ar estyniad a/neu ganiatâd, a wneir weithiau pan geisir estyniad mawr o amser, pan fo rhywun yn herio dedfryd fer o garchar ac felly efallai y bydd angen penderfyniad cyflymach neu mewn achosion cymhleth.

Y llys llawn fydd yn penderfynu'n derfynol a ddylid caniatáu'r apêl ai peidio. Gall y sawl y gwrthodir estyniad amser a/neu ganiatâd iddo gan y barnwr unigol adnewyddu ei gais/ceisiadau i'r llys llawn, a fydd angen

penderfynu a ddylid caniatáu estyniad ac yna a ddylid rhoi caniatâd cyn penderfynu ar yr apêl.

Mae "llys llawn" mewn unrhyw gais am euogfarn neu apêl yn cynnwys o leiaf dri barnwr, ac o leiaf ddau mewn unrhyw gais am ddedfryd neu apêl. Nid yw apeliadau fel arfer yn cynnwys ail-wrando tystiolaeth neu ail-ddedfrydu troseddwr. Fodd bynnag, gall y llys llawn dderbyn tystiolaeth (er enghraifft, datganiad tyst neu dystiolaeth arbenigol) nas derbyniwyd yn yr achos gwreiddiol os yw'n credu ei fod yn "angenrheidiol neu'n fanteisiol er budd cyfiawnder".

Os derbynnir tystiolaeth "newydd" gallai'r llys llawn ofyn pa effaith y gallai fod wedi'i chael neu y byddai wedi'i chael ar y rheithgor pe bai wedi'i chlywed. O ran apeliadau yn erbyn dedfryd, gallai tystiolaeth newydd arwain y llys i wyro oddi wrth ei drefn arferol o ystyried a oedd y ddedfryd yn gywir ar yr adeg y'i gwnaed.

Bydd y llys llawn yn caniatáu apêl yn erbyn euogfarn os yw'n credu bod yr euogfarn yn "anniogel". Yn rhannol oherwydd bod y llys yn ystyried "diogelwch" ac nid euog neu ddieuog, gall orchymyn ail dreial ar unrhyw droseddau y gallai'r rheithgor fod wedi dyfarnu'r apelydd yn euog ohonynt ar y ditiad. Mewn rhai amgylchiadau, gall y llys gyfnewid euogfarn am drosedd arall yn lle'r trosedd y cafwyd yr apelydd yn euog ohono. Os dedfrydwyd unigolyn ar ddau achos neu fwy ac nad yw'r llys ond yn diddymu rhai ohonynt, gall ail-ddedfrydu ar unrhyw achos sy'n weddill.

Bydd y llys llawn yn caniatáu apelio yn erbyn dedfryd os yw'n meddwl bod dedfryd "heb ei chyfiawnhau gan y gyfraith", "yn amlwg yn ormodol" neu'n "anghywir mewn

egwyddor”. Os yw’n credu y dylai unigolyn gael ei ddedfrydu’n wahanol, caiff ddiddymu unrhyw ddedfryd o’r fath a rhoi un y mae gan y llys gwreiddiol y pŵer i’w gwneud yn ei lle, ar yr amod nad ymdrinnir yn fwy llym â’r person, gan gymryd ei achos yn ei gyfanrwydd, wrth apelio na’r llys isod.

Gall apêl a benderfynwyd (ond nid cais am ganiatâd) gael ei apelio ymhellach gan naill ai’r apelydd neu’r erlyniad i’r Goruchaf Lys ar sail pwynt cyfreithiol o bwysigrwydd cyhoeddus cyffredinol.

Dim ond un apêl yn erbyn euogfarn neu ddedfryd y mae’n bosibl ei dwyn. Fodd bynnag, gall y Comisiwn Adolygu Achosion Troseddol gyfeirio euogfarn neu ddedfryd sydd eisoes wedi’i apelio i’r Adran Droseddol y Llys Apêl (ac, yn eithriadol, pan nad oes apêl wedi cael ei ddwyn). Daw’r cyfeiriad hwnnw’n apêl lawn, ac nid oes angen estyniad amser na chaniatâd.

Terfynau amser

Mynegodd sefydliadau bryderon wrthym nad yw 28 diwrnod yn ddigon hir i ymgeisydd sicrhau cyllid cyfreithiol, cynrychiolaeth neu “ail farn” ar rinweddau apêl, neu i gasglu tystiolaeth newydd, a bod ymgeiswyr digynrychiolaeth, ymgeiswyr agored i niwed neu ymgeiswyr benywaidd neu’r rhai a gafwyd yn euog o droseddau sy’n gysylltiedig â gangiau yn wynebu anawsterau penodol. Rydym wedi ein hargyhoeddi ei bod yn bosibl na fydd rhai ymgeiswyr yn gwybod y gallant wneud cais am ganiatâd y tu allan i’r cyfnod neu nad ydynt ond yn sylweddoli bod ganddynt resymau dros apelio ar ôl 28 diwrnod, a all fod yn gymharol fuan ar ôl carcharu.

Cwestiwn Cryno 3:

Ydych chi’n cytuno y dylai’r terfyn amser ar gyfer dwyn apêl yn erbyn euogfarn neu ddedfryd i’r Adran Droseddol y Llys Apêl gynyddu i 56 diwrnod o ddyddiad y ddedfryd?



Gorchmynion “Colli amser”

Fel arfer, mae’r amser y mae unigolyn yn ei dreulio yn y carchar wrth aros i’w gais am apêl gael ei benderfynu yn cyfrif tuag at ei ddedfryd. Yn eithriadol, os yw’r Adran Droseddol y Llys Apêl yn credu bod cais neu apêl yn gwbl ddi-werth, gall wneud gorchmyn “colli amser”, sy’n golygu nad yw rhywfaint o’r amser rhwng cyflwyno’r cais am ganiatâd i apelio a’i benderfyniad yn cyfrif fel pe bai wedi’i gyflwyno. I bob pwrpas, mae’r amser yn cael ei ychwanegu at yr amser y bydd yr unigolyn yn ei dreulio yn y carchar. Mae’r gorchmynion fel arfer am 14, 28 neu (yn anaml) 56 diwrnod. Mae gan farnwyr unigol y pŵer i wneud y gorchmynion hyn, ond nid oes yr un ohonynt wedi gwneud hynny ers mis Hydref 2007. Bydd y llys llawn bron bob amser yn gwneud gorchmyn dim ond os yw’r barnwr unigol wedi rhybuddio’r ymgeisydd yn benodol am y risg o gael gorchmyn drwy lofnodi blwch ar y ffurflen y maent yn ei hanfon atynt wrth wrthod caniatâd i apelio.

Mae gorchmynion colli amser yn un o'r unig ffyrdd sydd gan yr Adran Droseddol y Llys Apêl i atal apeliadau annheilwng rhag cymryd amser llys gwerthfawr. Fodd bynnag, rydym wedi cael tystiolaeth bod argaeledd y pŵer y mae rhai'n ei ddisgrifio fel un llym yn atal apeliadau teilwng, diliys a dadleuol. Dywedwyd wrthym fod yr "effaith atal" hon yn arbennig o gryf oherwydd, yn ymarferol, er nad yw'r llys ond yn gosod gorchmynion colli amser pan fo ymgeisydd aflwyddiannus yn adnewyddu ei gais gerbron y llys llawn, ac am gyfnod penodol, byddai cyfreithiwr yn gywir i'w rhybuddio am y posibilrwydd damcaniaethol o gael gorchymyn colli amser. Mae hyn yn bosib hyd yn oed pan nad yw wedi'i rhybuddio'n benodol eto gan yr Adran Droseddol y Llys Apêl, ac y gallai'r gorchymyn fod am y cyfnod cyfan rhwng cyflwyno cais ac i hwnnw gael ei benderfynu.

Rydym yn gweld achos dros ddiddymu'r gorchmynion yn gyfan gwbl, ond rydym yn gwerthfawrogi eu bod yn caniatáu i Adran Droseddol y Llys Apêl gael rhywfaint o reolaeth dros geisiadau a'u bod bron bob amser yn cael eu defnyddio dim ond pan fydd ymgeisydd yn parhau gyda chais anobeithiol ar ôl cael rhybudd am y posibilrwydd o orchymyn pe bai'n ei adnewyddu.

Cwestiwn Cryno 4:

A ydych yn cytuno y dylai gorchmynion colli amser fod â therfyn uchaf o 56 diwrnod ac na ddylent fod ar gael oni bai:

1. bod caniatâd i apelio wedi cael ei wrthod gan y barnwr unigol yn gyfan gwbl heb unrhyw haeddiant,
2. rhybuddir yr ymgeisydd y bydd, pe bai'n adnewyddu ei gais, mewn perygl o golli gorchymyn amser, a
3. bod yr ymgeisydd yn adnewyddu ei gais gerbron y llys llawn a'i fod yn ei wrthod yn llwyr fel un cwbl annheilwng?

“Rheol llithriadau” ar gyfer Adran Droseddol y Llys Apêl

Ar hyn o bryd nid oes gan Adran Droseddol y Llys Apêl unrhyw bŵer i gywiro gwallau a wnaed yn ei ddyfarniadau neu ei orchmynion. I wahanol raddau, mae gan lysoedd eraill bwerau i wneud unrhyw beth o gywiro gwallau gramadegol i ail-wrando achosion a benderfynwyd. Yn berthnasol, gall Llys y Goron amrywio neu ganslo dedfryd a roddir o fewn 56 diwrnod i'w gosod, ond rhaid i hyn gael ei wneud gan yr un barnwr a roddodd y ddedfryd yn wreiddiol.

Credwn mai anghysonder yw diffyg rheol gyfatebol ar gyfer yr Adran Droseddol y Llys Apêl. Er bod gan Adran Droseddol y Llys Apêl bŵer eithriadol i ailagor penderfyniadau, mae diffyg “rheol llithriadau” yn golygu na oes ffordd hawdd o gywiro gwallau annadleuol a wneir gan Adran Droseddol y Llys Apêl (naill ai mewn dedfryd a roddir yn ei lle neu drwy ddibynnu ar ryw beth mewn camgymeriad pan fydd yn caniatáu neu'n

diystyru apêl). Yn aml, nid yw llithriadau o'r fath yn codi pwyntiau cyfreithiol o bwysigrwydd cyhoeddus cyffredinol, sy'n golygu nad ydynt yn debygol o gael caniatâd i apelio i'r Goruchaf Lys.

Cwestiwn Cryno 5:

Ydych chi'n cytuno y dylai Adran Droseddol y Llys Apêl fod â'r pŵer i gywiro llithriad neu hepgoriad damweiniol mewn dyfarniad neu orchymyn o fewn 56 diwrnod i'w gyflwyno neu ei wneud? Os felly, pwy ydych chi'n meddwl ddylai allu arfer y pŵer hwn? Er enghraifft, ai:

1. pob un o'r un barnwyr a wnaeth y dyfarniad neu'r gorchymyn;
2. y barnwr uchaf (llywyddol) a wnaeth y dyfarniad neu'r gorchymyn;
3. unrhyw un o'r barnwyr a wnaeth y dyfarniad neu'r gorchymyn; neu
4. unrhyw farnwr sy'n gallu eistedd yn Adran Droseddol y Llys Apêl?

Tystiolaeth newydd

Fel y trafodwyd uchod, y prawf ar gyfer derbyn dystiolaeth newydd yw a yw "er budd cyfiawnder". Wrth benderfynu ar hyn, rhaid i Adran Droseddol y Llys Apêl ystyried y canlynol:

- a. a yw'n ymddangos bod modd credu'r dystiolaeth,
- b. a allai'r dystiolaeth ddarparu unrhyw sail dros ganiatáu'r apêl,
- c. a fyddai'r dystiolaeth wedi bod yn dderbyniol yn achos Llys y Goron; a
- d. bod esboniad rhesymol am fethu â derbyn y dystiolaeth yn yr achos gwreiddiol.

Rydym yn bryderus bod y pedair ystyriaeth hyn weithiau'n cael eu trin fel meini prawf gorfodol i'w bodloni er mwyn derbyn dystiolaeth newydd. Ar yr amod nad yw'r ystyriaethau'n cael eu trin fel meini prawf, credwn mai'r prawf "er budd cyfiawnder" yw'r prawf cywir.

Cwestiwn Cryno 6:

Ydych chi'n cytuno y dylai Adran Droseddol y Llys Apêl barhau i dderbyn dystiolaeth newydd pan fydd er budd cyfiawnder, ar sail y pedair ystyriaeth bresennol?

Rydym yn credu bod problemau pan fydd pobl sydd wedi'u cael yn euog yn dymuno dadlau nad yw eu heuogfarn yn ddiogel oherwydd ymddygiad/camymddwyn gan reithwyr.

Mae cadw trafodaethau rheithwyr yn gyfrinach yn caniatáu i reithwyr siarad yn rhydd yn ystafell y rheithgor. Yn dilyn argymhellion a wnaed gennym yn 2013, creodd Deddf Cyfiawnder Troseddol a Llysoedd 2015 eithriadau i'r rheol gyffredinol bod datgelu trafodaethau rheithgor yn anghyfreithlon, gan ganiatáu ar gyfer datgelu gwybodaeth i'r heddlu neu i'r llysoedd a allai fod yn sail i apêl.

Fodd bynnag, mae cyfraith achosion sy'n rhagflaenu'r newid hwn yn golygu na all llysoedd ystyried trafodaethau oni bai fod y rheithgor wedi cefnu'n llwyr ar eu llw i roi achos ar brawf yn ôl y dystiolaeth (er enghraifft drwy daflu ceiniog) neu os cyflwynir deunydd allanol, na chafodd ei gyflwyno yn y treial, i'r trafodaethau.

Cyfrinachedd Rheithwyr a'r Confensiwn Ewropeaidd ar Hawliau Dynol

O dan erthygl 6 o'r Confensiwn Ewropeaidd ar Hawliau Dynol, mae gan bawb yr hawl i dreial teg gerbron tribiwnlys annibynnol a diduedd.

Yn achos *Gregory v UK*,² cydnabu Llys Hawliau Dynol Ewrop fod cyfrinachedd rheithwyr yn amddiffyniad hanfodol i ganiatáu trafodaethau agored rhwng rheithwyr. Dywedodd nad oedd y diffynnydd yn yr achos hwnnw wedi cael ei amddifadu o'r hawl i dreial teg lle gwnaed honiadau o hiliaeth ar ran rheithwyr, oherwydd bod barnwr y treial wedi ymchwilio i'r honiadau ac wedi atgoffa'r rheithgor o'u dyletswydd i roi achos ar brawf ar sail y dystiolaeth.

Yn achos *Remli v France*,³ fodd bynnag, canfu'r Llys nad oedd barnwr y treial wedi ymchwilio i sylwadau hiliol gan reithiwr, ac nad oedd y diffynnydd yn gallu apelio yn erbyn ei euogfarn i lys uwch ar y pwynt hwn. Roedd yn honni bod hawl y diffynnydd i dreial teg wedi'i wrthod.

Nid ydym yn credu y dylai cyfrinachedd rheithwyr atal yr Adran Droseddol y Llys Apêl rhag ystyried tystiolaeth sy'n awgrymu na chafodd diffynnydd dreial teg gerbron rheithgor annibynnol a diduedd. Credwn y gellid diogelu cyfrinachedd rheithwyr yn ddigonol drwy sicrhau eu bod yn aros yn ddienw mewn unrhyw achos. Gan fod rheithwyr eisoes yn gallu gwneud datgeliadau mewn amgylchiadau cyfyngedig, nid ydym yn credu y byddai'r newid hwn yn effeithio ar barodrwydd rheithwyr i siarad yn rhydd yn ystafell y rheithgor. Credwn hefyd y dylid ychwanegu'r Comisiwn Adolygu Achosion Troseddol at y rhestr o gyrff y gall rheithwyr wneud datgeliad cyfreithiol o gamymddwyn iddynt.

Cwestiwn Cryno 7:

Ydych chi'n cytuno y dylid newid y gyfraith er mwyn caniatáu i Adran Droseddol y Llys Apêl dderbyn tystiolaeth o drafodaethau'r rheithgor pan allai'r dystiolaeth ddarparu sail ar gyfer apêl, megis na chafodd unigolyn dreial teg gerbron rheithgor diduedd?

2 1998) 25 EHRR 577 (Rhif y Cais 22299/93).

3 (1996) 22 EHRR 253 (Rhif y Cais 16839/90).

Y prawf diogelwch ar gyfer apeliadau euogfarn

Mae'r prawf ar gyfer caniatáu apêl yn erbyn euogfarn wedi newid sawl gwaith ers 1907, ond mae'r prawf presennol sy'n gofyn a yw'r euogfarn "yn anniogel" wedi bod ar waith ers 1995.

Bydd apêl unigolyn yn cael ei chaniatáu pan brofir ei fod, neu ei fod o bosibl, yn ffeithiol ddieuog— hynny yw, nad oedd wedi cyflawni'r drosedd o gwbl, na gweithred sy'n rhan hanfodol ohoni.

Fodd bynnag, mae cyfraith Cymru a Lloegr wedi hen gydnabod pwysigrwydd treial teg a chyfiawnder yn cael ei wneud yn gyfiawn, ac mae erthygl 6 o'r Confensiwn Ewropeaidd ar Hawliau Dynol yn sicrhau'r hawl i dreial teg. Oherwydd hyn, bydd apêl bron bob amser yn cael ei chaniatáu pan fydd Adran Droseddol y Llys Apêl yn dod i'r casgliad nad oedd treial unigolyn, yn ei gyfanrwydd (mewn geiriau eraill, gan anwybyddu gwallau gweithdrefnol mwy technegol) annheg neu wrth erlyn unigolyn a oedd yn ymwneud â cham-drin proses o'r fath yn gyfystyr ag "amarch i gyfiawnder". Un mater allweddol a nodwyd gennym yw yr awgrymwyd o bryd i'w gilydd y gellir gorbwyso'r ffaith nad oedd y cyhuddedig wedi cael treial teg gan gryfder tystiolaeth yr erlyniad.

Rydym yn deall anesmwythyd ynghylch euogfarnau unigolion sy'n amlwg yn euog yn cael eu diddymu "ar sail dechnegol", ond bydd yr opsiwn o ail dreial yn aml ar gael ac yn dangos bod treial yn annheg yn ei gyfanrwydd neu fod yr erlyniad yn amarch i gyfiawnder yn drothwyon uchel iawn i'w gorchfygu. Mae hyn yn ein darbwyllo na all euogfarnau yn yr amgylchiadau hyn fyth fod yn ddiogel ac rydym am egluro hyn.

Cwestiwn Cryno 8:

Ydych chi'n cytuno y dylai euogfarn sy'n "anniogel" barhau i fod yr unig sail mewn prawf wrth ystyried apeliadau yn erbyn euogfarn? Ydych chi'n cytuno y dylai deddfwriaeth gadarnhau arfer presennol Adran Droseddol y Llys Apêl bod "anniogel" yn ymestyn i sefyllfaoedd lle mae'n ystyried (1) bod treial yr apelydd, yn ei gyfanrwydd, yn annheg neu (2) bod yr euogfarn yn cynnwys cam-drin proses sy'n gyfystyr ag amarch i gyfiawnder?

Ail dreialon

Wrth ganiatáu apêl yn erbyn euogfarn, gall yr Adran Droseddol y Llys Apêl orchymyn ail dreial os "mae'n ymddangos i'r Llys fod er budd cyfiawnder yn gofyn am hynny." Mynegodd rhai ymgyingoreion y farn, hyd yn oed pan fydd tystiolaeth newydd yn cael ei chyflwyno neu pan nodwyd gwall cyfreithiol a allai fod wedi arwain y rheithgor at ryddfarnu, fod Adran Droseddol y Llys Apêl yn aml yn canfod bod euogfarnau yn ddiogel. Lle gallai tystiolaeth newydd fod wedi arwain y rheithgor at ryddfarnu, credwn, oni bai ei bod yn amhosibl neu'n anymarferol gorchymyn ail dreial, y dylid diddymu euogfarn ac (os yw hynny er budd cyfiawnder) gorchymyn ail dreial fel y gall rheithgor wneud penderfyniad yng ngoleuni'r dystiolaeth newydd.

Cwestiwn Cryno 9:

Ydych chi'n cytuno, mewn apeliadau euogfarn, lle mae Adran Droseddol y Llys Apêl yn derbyn tystiolaeth newydd a allai fod wedi arwain y rheithgor at ryddfarnu, y dylai orchymyn ail dreial oni bai fod un yn amhosibl neu'n anymarferol?

Y prawf “ anghyfiawnder sylweddol”

Os yw'r sawl a gafwyd yn euog yn credu nad yw ei euogfarn yn ddiogel oherwydd newid mewn dehongliad barnwrol o'r gyfraith ar ôl ei euogfarn, ond bod angen mwy o amser arno er mwyn apelio, rhaid iddo ddangos “anghyfiawnder sylweddol”. Nid yw'r ffaith bod y gyfraith wedi newid (neu fod datblygiad wedi bod yn y gyfraith) ynddo'i hun yn ddigonol.

Mae hyn yn golygu bod ymgeiswyr o'r fath yn wynebu trothwy uwch nag eraill sydd angen estyniadau amser. Mae'r rheswm yn mynd at galon ein system gyfreithiol o gynsail a defnyddio'r gyfraith (cyfraith statudol a chyfraith wedi'i phennu gan farnwyr) sydd mewn grym ar yr adeg berthnasol. Mae cysylltiad agos rhyngddi â'r egwyddor o derfynoldeb.

Onid os bydd y Goruchaf Lys yn penderfynu bod llysoedd wedi bod yn defnyddio neu'n dehongli'r gyfraith yn anghywir, a bod y sawl a gafwyd yn euog yn credu na fyddent yn cael eu dyfarnu'n euog dan y gyfraith newydd “gywir”, mae ganddynt achos da i herio eu heuogfarn.

Daeth y tensiwn hwn i'r amlwg yn dilyn penderfyniad y Goruchaf Lys yn 2016 yn achos *Jogee*,⁴ a oedd yn mynd i'r afael ag atebolrwydd troseddol pobl pan fyddant yn helpu, yn ymuno â throsedd neu'n cytuno i gyflawni trosedd, lle mae un o'r rhai dan sylw yn cyflawni trosedd mwy difrifol (“atebolrwydd affeithiwr parasitig”).



4 *R v Jogee* [2016] UKSC 8 and *Ruddock v The Queen* [2016] UKPC 7, [2017] AC 387.

Menter ar y cyd ac achos y Goruchaf Lys - Jogee

Pan fydd dau neu fwy o bartïon yn cyflawni trosedd gyda'i gilydd, maent i gyd yn agored i gael eu dyfarnu'n euog o'r trosedd. Mae hyn yn cynnwys y rhai a anogodd neu a helpodd i gyflawni'r trosedd. Er enghraifft, mae tri unigolyn yn lladrata gyda'i gilydd mewn banc: mae un yn bygwth y staff gyda gwn; mae'r ail yn rhoi'r arian mewn bag; mae'r trydydd yn cadw golwg ac yn gyrru'r cerbyd i ddianc. Mae'r tri yn euog o laddrad ar sail menter ar y cyd.

O dan athrawiaeth “atebolrwydd affeithiwr parasitig”, os yw un parti mewn menter ar y cyd wedi rhagweld y gallai'r parti arall gyflawni trosedd arall fel rhan o'r fenter honno ar y cyd, gellid cael y naill a'r llall yn euog o'r trosedd arall. Er enghraifft, pe bai dau unigolyn yn cytuno i laddrad hwnnw, mae un o'r partiön yn trywanu deiliad tŷ, gellid cael y lleidr arall yn euog pe bai wedi rhagweld y gallai hyn ddigwydd. Os oedd y byrgler a drywanodd yn bwriadu achosi niwed difrifol, yna gellid cael y lleidr arall yn euog o lofruddiaeth.

Yn achos *Jogee*, roedd y Goruchaf Lys o'r farn bod hyn yn anghywir. Er mwyn ei gael yn euog o'r trosedd mwy difrifol, roedd yn rhaid i'r parti i'r fenter ar y cyd fwriadu, nid dim ond rhagweld, y byddai'r parti arall sy'n gysylltiedig â'r fenter yn cyflawni'r trosedd. Gallai'r bwriad hwnnw fod yn amodol – er enghraifft, os oeddent yn bwriadu trywanu'r deiliad tŷ, os oedd angen. Roedd rhagweld yn rhywbeth y gallai rheithgor (ond nad oes angen iddynt) ei ddefnyddio i ddod o hyd i'r bwriad (amodol) angenrheidiol.

Mae dyfarniad y Goruchaf Lys yn achos *Jogee* yn awgrymu, mewn theori, ei bod yn “anghywir” bod unrhyw un wedi'i gael yn euog o gyflawni trosedd mwy difrifol na'r hyn a gytunwyd, yn seiliedig ar ragweld yn unig. Y ddau anhawster uniongyrchol yw (1) y gallai hyn arwain at nifer o apeliadau na ellir eu rheoli, yn enwedig gan fod erlyniadau llofruddiaeth menter ar y cyd fel arfer yn cynnwys nifer o ddiffnyddion, a (2) mai ychydig o erlyniadau a oedd yn cael eu dadlau ar sail rhagweld yn unig – er y gallai'r barnwr fod wedi cynnwys rhagweld yn y cyfarwyddiadau i'r rheithgor. Felly, anaml y bydd yn glir a yw'r rheithgor wedi'i gael yn euog ar sail rhagweld, neu a oedd mewn gwirionedd yn fodlon bod yr unigolyn wedi bwriadu i'r dioddefwr gael ei anafu'n ddiffrifol neu'n angheuol.

Mae'r prawf “anghyfiawnder sylweddol” yn ei gwneud yn ofynnol i'r sawl a geir yn euog o dan yr “hen” gyfraith mewn achosion tebyg i *Jogee* brofi bod eu heuogfarn dan yr hen gyfraith wedi peri iddynt ddioddef “anghyfiawnder sylweddol” er mwyn i'w hapêl gael ei chlywed.

Roedd y Goruchaf Lys yn achos *Jogee* yn cydnabod y prawf “anghyfiawnder sylweddol” yn benodol, ond mae llawer wedi dadlau bod Adran Droseddol y Llys Apêl yn ei ddefnyddio'n rhy llym, yn enwedig pan all nid yn unig orchymyn ail dreial mewn achosion o'r fath ond hefyd rodder collfarn o lofruddiaeth ag un am ddynladdiad (nad yw'n cynnwys dedfryd oes orfodol). Dim ond dwy apêl tebyg i *Jogee* sydd wedi cael eu caniatáu ers 2016.

Mae'r prawf hefyd yn berthnasol mewn sefyllfaoedd eraill. Er enghraifft, nid oedd rhai ceiswyr lloches a gafodd eu herlyn am feddu ar ddogfennau ffug yn cael defnyddio eu statws fel amddiffyniad os oeddent wedi teithio drwy wlad “ddiogel” cyn cyrraedd y DU. Mae'r gyfraith bellach yn cydnabod nad yw hyn yn atal unigolyn rhag defnyddio'r

amddiffyniad. Yn *Ordu*,⁵ penderfynodd Adran Droseddol y Llys Apêl nad oedd yn ddigon i ddangos na fyddai'r unigolyn wedi cael ei ddyfarnu'n euog pe bai'r gyfraith wedi'i chymhwyso'n gywir; roedd yn rhaid iddynt ddangos bod yr euogfarn yn achosi rhywfaint o anghyfiawnder parhaus iddynt.

Gwelsom fod rhywfaint o ansicrwydd ynghylch ystyr "anghyfiawnder sylweddol", ac a yw'n cael ei asesu drwy edrych yn ôl at ddyddiad yr euogfarn, gan ofyn a oedd yn anghyfiawnder sylweddol y cafwyd y diffynnydd yn euog ohono, neu drwy edrych ymlaen o'r cais, a gofyn a fyddai anghyfiawnder sylweddol pe na bai'r apêl yn cael ei chlywed neu ei chaniatáu.

Mae rhai ymgynghoreion wedi dadlau bod athrawiaeth menter ar y cyd yn cael effaith anghymesur ar grwpiau lleiafrifol ac yn enwedig dynion du ifanc, ac felly gallai'r gofyniad i ddangos "anghyfiawnder sylweddol" effeithio'n benodol ar y grwpiau hyn.

Credwn y gellir dadlau'n gryf "anghyfiawnder sylweddol" wedi dod yn rhwystr gwirioneddol i gywiro camweinyddiad cyfiawnder, ac y dylid diwygio'r gyfraith i ganiatáu i unigolyn apelio yn erbyn ei euogfarn drwy ddadlau, pe bai'r gyfraith "wedi'i chywiro" wedi cael ei rhoi ar waith yn eu hachos nhw, efallai na fyddent wedi cael eu dyfarnu'n euog o'r drosedd (neu drosedd debyg).

Cwestiwn Cryno 10:

Ydych chi'n credu bod "anghyfiawnder sylweddol" yn llesteirio cywiro camweinyddiad cyfiawnder? Pa brawf y dylid ei ddefnyddio pan fydd unigolyn yn ceisio apelio yn erbyn ei euogfarn ar y sail bod datblygiad wedi digwydd yn y gyfraith?

Apeliadau yn erbyn dedfryd: newid mewn amgylchiadau a charchar er mwyn gwarchod y cyhoedd (IPP)

Mae apeliadau dedfrydu fel arfer yn adolygu proses a phenderfyniad y barnwr dedfrydu wrth ddod i ddedfryd, gan roi llawer o barch at eu casgliadau ar ffeithiau, yn ogystal â'u pwysu a'u mesur. Fel rhan o hynny, maent yn canolbwyntio ar y sefyllfa ar ddyddiad y ddedfryd ac nid ar y sefyllfa (sydd o bosibl wedi newid) pan glywir yr apêl. Mae'r profion y mae Adran Droseddol y Llys Apêl yn eu defnyddio, yn benodol a yw dedfryd yn "amlwg yn ormodol", wedi cael eu beirniadu, yn rhannol am nad ydynt wedi'u nodi mewn deddfwriaeth, ond nid ydym yn credu bod achos digon cryf dros eu newid.

Cwestiwn Cryno 11:

Ydych chi'n cytuno na ddylid newid y prawf/profion ar gyfer caniatáu apeliadau dedfryd yr Adran Droseddol y Llys Apêl?

Roeddem wedi nodi tensiwn yn ymarfer yr Adran Droseddol y Llys Apêl, er nad yw'n ystyried newidiadau mewn amgylchiadau rhwng dedfryd a'i hapêl i raddau helaeth, gall wneud hynny pan ddarganfyddir beichiogrwydd neu fater ieuchyd difrifol ar ôl dedfrydu, neu wrth ddiddymu dedfryd ac ail-ddedfrydu troseddwr.

Ar wahân i hynny, cododd nifer o ymgynghoreion fater y ddedfryd o garchar er mwyn diogelu'r cyhoedd.

5 *R v Ordu* [2017] EWCA Crim 4, [2017] 1 Cr App R 21.

Dedfrydau o garchar er mwyn diogelu'r cyhoedd (IPP)

Cyflwynwyd y Dedfrydau hyn yn 2005 ac fe'u diddymwyd yn 2012. Fe'u cyflwynwyd i ddelio â throsteddwyr peryglus, gan gynnwys rhai nad oedd eu trosteddau'n gymwys i gael dedfryd oes ddewisol - cafodd 8,711 eu rhoi. Roedd y Dedfrydau hyn, fel dedfrydau oes, yn "amhenodol", a oedd yn golygu eu bod yn caniatáu i drosteddwr gael ei gadw yn y carchar am ei oes gyfan, a'u bod yn dod gyda chyfnod sylfaenol yr oedd yn rhaid iddynt ei dreulio yn y carchar cyn y gallent wneud cais am barôl. I ddechrau, roedd yn rhaid i lysoedd osod y Dedfrydau mewn rhai amgylchiadau os na roddwyd dedfryd oes, ac roedd rhagdybiaeth bod trosteddwr yn beryglus pe bai wedi'i gael yn euog o rai trosteddau treisgar neu rywiol yn y gorffennol. Cafodd y rheolau hyn eu llacio yn 2008, gan roi mwy o ddisgresiwn i farnwyr beidio â gosod dedfryd o garchar er mwyn diogelu'r cyhoedd.

Yn 2012, dyfarnodd Llys Hawliau Dynol Ewrop fod y rhagdybiaeth o berygl, a'r cyfyngiadau ar ddisgresiwn barnwrol, ynghyd â chyfleoedd cyfyngedig i garcharorion ymgymryd â gwaith adsefydlu, yn golygu bod gweithredu'r drefn o osod dedfryd o garchar er mwyn diogelu'r cyhoedd yn gyfystyr â chael eu cadw'n gaeth yn fympwyol, yn groes i erthygl 5 o'r Confensiwn Ewropeaidd ar Hawliau Dynol.

Diddymwyd y Ddedfryd yn 2012. Fodd bynnag, nid oedd hyn yn effeithio ar y rhai a oedd eisoes wedi cael eu dedfrydu i garchar er mwyn diogelu'r cyhoedd. Ers hynny, mae deddfwriaeth wedi newid y rheolau sy'n llywodraethu amodau ôl-ryddhau i alluogi

carcharorion y Ddedfryd sydd wedi cael eu rhyddhau i gael terfynu eu trwydded yn haws. Fodd bynnag, nid yw darpariaeth sy'n caniatáu i weinidogion lacio'r prawf parôl sy'n berthnasol cyn y gellir rhyddhau carcharor y Ddedfryd wedi cael ei defnyddio.

O ran y prosiect hwn, y broblem yw, er bod apeliadau'n cael eu dwyn ar y sail na ddylai'r Ddedfryd fod wedi cael ei gorfodi o dan y gyfraith fel yr oedd, yn amlach na pheidio, y gwyn yw bod y gyfraith sy'n rheoli'r Ddedfryd ei hun wedi arwain at anghyfiawnder. Mae tystiolaeth bod carcharorion y Ddedfryd yn fwy tebygol o hunan-niweidio, a bod modd dod â throsteddwyr y Ddedfryd sydd wedi'u rhyddhau yn ôl i'r carchar am dorri mân reolau eu trwydded. Ar y llaw arall, canfuwyd bod trosteddwyr y Ddedfryd yn y treial yn "beryglus" ac, os oedd eu dedfrydau'n cael eu diddymu'n gyfan gwbl, gellid rhyddhau pobl a allai fod yn beryglus i'r gymuned ar unwaith; gallai ail-ddedfrydu pob trosteddwr o'r fath hefyd orlethu system y llysoedd. Felly, byddai gennym ddiddordeb mewn clywed eich barn ynghylch a ddylai'r rhai a ddedfrydir i Garchar er mwyn Diogelu'r Cyhoedd gael hawl unigryw i apelio neu i gael eu hail-ddedfrydu, ac a ddylid cael prawf pwrpasol ar gyfer dileu'r ddedfryd honno.

Cwestiwn Cryno 12:

Ydych chi'n credu bod pwerau presennol Adran Droseddol y Llys Apêl yn ddigonol i ddelio â newidiadau mewn amgylchiadau ar ôl dedfrydu, boed hynny i amgylchiadau personol neu newidiadau yn y gyfraith fel diddymu dedfrydau o garchar er mwyn diogelu'r cyhoedd?

Apeliadau'r Erlyniad i'r Adran Droseddol y Llys Apêl

Fel arfer, ni all yr erlyniad apelio yn erbyn rhyddfarnau neu ddedfrydau mewn achosion difrifol. Fodd bynnag, gall y Twrnai Cyffredinol a'i ddirprwy, y Cyfreithiwr Cyffredinol, "gyfeirio" dedfryd i Adran Droseddol y Llys Apêl ar y sail ei fod yn "rhy drugarog". Gall y Twrnai Cyffredinol hefyd gyfeirio achos at Adran Droseddol y Llys Apêl i gael eglurhad ar y gyfraith dan sylw lle mae unigolyn wedi cael ei ryddhau.

Yn eithriadol, ynghylch rhai troseddau difrifol iawn, gall y Cyfarwyddwr Erlyniadau Cyhoeddus ganiatáu cais i Adran Droseddol y Llys Apêl am orchymyn sy'n diddymu rhyddfarniad ac yn gorchymyn ail dreial lle ceir tystiolaeth newydd gref.

Mae apeliadau yn erbyn erlyniad yn ymwneud â'r egwyddor o osgoi "perygl dwbl" (hynny yw, bod yn destun achos troseddol—gan gynnwys dedfryd—am yr un trosedd honedig fwy nag unwaith). Cafodd y rheol absoliwt yn erbyn cael eich rhoi ar brawf ddwywaith am yr un trosedd honedig ei diddymu yn 2005 ac, mewn cyd-destunau eraill, mae'r egwyddor ehangach wedi gwanhau yn y blynyddoedd diwethaf.

Cyfeiriadau dedfrydau rhy drugarog

Gall yr Atwrnai Cyffredinol gwneud cyfeirnod at ddedfrydau "rhy drugarog" ar gyfer troseddau y gellir eu profi ar dditiad yn unig (er enghraifft, treisio neu lofruddio) a rhai troseddau eraill a nodir mewn Gorchymyn 2006 (er enghraifft, nifer o droseddau rhywiol neillffordd). Rhaid cyfeirio o fewn 28 diwrnod i'r ddedfryd; mae'r terfyn amser hwn yn absoliwt. Mae dedfryd "rhy drugarog" yn un sydd y tu allan i'r ystod o ddedfrydau y gallai'r barnwr, gan gymhwyso ei feddwl i'r holl ffactorau perthnasol ac yn ymwneud yn unig â ffeithiau a ganfuwyd neu a dderbyniwyd yn y treial, fod wedi ystyried yn rhesymol eu bod yn briodol. Yn yr un modd ag apeliadau unigolion a gafwyd yn euog, rhaid i Adran Droseddol y Llys Apêl roi caniatâd yn gyntaf i'r Atwrnai Cyffredinol.

Hyd yn oed os yw'r Adran Droseddol y Llys Apêl yn ystyried bod dedfryd yn "rhy drugarog", gall benderfynu peidio â'i chynyddu neu roi disgownt i bob pwrpas ar gyfer unrhyw gynnydd.

Cyfeiriadau dedfrydau rhy drugarog, 2023

842 o ddedfrydau wedi'u hystyried gan y Twrnai Cyffredinol

139 o ddedfrydau wedi'u hatgyfeirio i'r Llys Apêl

Caniatâd wedi'i roi, dedfryd wedi'i chynyddu:
93 o ddedfrydau

Caniatâd wedi'i roi, dedfryd heb ei newid:
19 o ddedfrydau

Caniatâd wrthod:
27 o ddedfrydau

Ychydig iawn o bryder a glywsom am y gyfraith bresennol sy'n rheoli cyfeiriadau "rhy drugarog" at ddedfrydau, ond mae rhai wedi eiriol i ni, a bu dicter ymhlith y cyhoedd o bryd i'w gilydd, ynghylch yr anallu i gyfeirio rhai troseddau (nid yn dditiol yn unig nac o fewn Gorchymyn 2006). Y prif rai ohonynt yw achosi marwolaeth drwy yrru'n ddiofal a throseddau yn ymwneud â chreulondeb tuag at anifeiliaid.

Cwestiwn Cryno 13:

Ydych chi'n credu y dylid cynnwys (1) trosedd sy'n ymwneud â marwolaeth nad yw wedi'i gynnwys ar hyn o bryd, fel achosi marwolaeth drwy yrru'n ddiofal a/ neu (2) troseddau creulondeb tuag at anifeiliaid yn y cynllun cyfeirio dedfryd "rhy drugarog"? A oes unrhyw droseddau eraill nad ydynt wedi'u cynnwys ar hyn o bryd a ddylai fod yn eich barn chi?

Herio rhyddfarnau

Mewn achos diannod, gall yr erlyniad apelio yn erbyn rhyddfarn ar bwynt cyfreithiol ar ffurf "achos wedi'i ddatgan" neu adolygiad barnwrol o ryddfarn.

Hefyd, mewn rhai achosion, os yw unigolyn yn ymyrryd ag achos troseddol, yn cael ei ddarfarnu'n euog o drosedd "gweinyddu cyfiawnder" mewn perthynas â nhw ac mae posibilrwydd gwirioneddol y byddai rhyddfarn yn yr achos hwnnw yn deillio o'r ymyrraeth, gall yr Uchel Lys ddiddymu'r rhyddfarn, gan ganiatáu treial newydd (gweler "Rhyddfarnau llygredig" isod).

Ers 2005, bu'n bosibl i'r erlyniad wneud cais i Adran Droseddol y Llys Apêl i ddiddymu

rhyddfarn ar gyfer rhai troseddau difrifol lle ceir tystiolaeth newydd a chymhellol ac na fyddai ail dreial yn groes i fuddiannau cyfiawnder. Mae angen i'r erlynydd sy'n gwneud cais gael cydsyniad y Cyfarwyddwr Erlyniadau Cyhoeddus ac ni ellir gwneud mwy nag un cais ynglŷn â rhyddfarn. Mae'r pŵer wedi galluogi ail dreial a cholffarnu nifer o droseddau drwggenwog a oedd wedi'u cael yn ddieuog yn y gorffennol, yn dilyn degawdau o ymgyrchu gan ddioddefwyr a'u teuluoedd.

Roedd y rhai a ymatebodd i gwestiynau apeliadau'r erlyniad yn ein Papur Materion yn fodlon ar y cyfan â'r system bresennol, ond, yn yr un modd â'r cynllun dedfryd "rhy drugarog", roedd pryderon ynghylch eithrio rhai troseddau difrifol penodol o'r rhestr o droseddau difrifol y mae'r weithdrefn yn berthnasol iddynt, nad yw wedi'i newid ers cyflwyno'r pŵer. Mae'r rhestr bresennol yn cynnwys llofruddiaeth, dynladdiad, treisio, hil-laddiad a rhai troseddau terfysgaeth a chyffuriau difrifol.

Mae rhai anghysonderau. Er enghraifft, mae dynladdiad a dynladdiad corfforaethol yn cael eu cynnwys, er mai dim ond gyda dirwy y gellir cosbi'r olaf. Fodd bynnag, nid yw achosi neu ganiatáu marwolaeth plentyn, sy'n cario dedfryd oes bosibl, yn cael ei gynnwys. Mae trais ac ymosodiadau rhywiol treiddiol yn cael eu cynnwys, ond nid rhai mathau hŷn o droseddau rhywiol penodol sydd wedi cael eu disodli ers hynny. Er enghraifft, nid yw treisio drwy'r anws a gyflawnwyd cyn 1994, a threisio drwy'r geg a gyflawnwyd cyn 2005 wedi'u cynnwys (gan nad oedd y rhain yn gyfreithiol yn gyfystyr â threisio ar y pryd, ond yn "ymosodiad anwedus"). Yn ogystal, nid yw ymosodiadau rhywiol, gan gynnwys ymosodiadau rhywiol ar blant, yn cael eu cynnwys os nad ydynt yn cynnwys treiddio.

Rydy wedi ein darbwyllo dros dro mai anghysonder yw peidio â chynnwys ymddygiad o'r fath, sydd ar begwn difrifol troseddu sydd eisoes yn ddifrifol iawn.

Cwestiwn Cryno 14:

Ydych chi'n cytuno y dylid cynnwys (1) treisio drwy'r geg a thrwy'r anws, (2) ymosodiadau rhywiol treiddiol eraill a gyhuddir o dan ddeddfwriaeth hanesyddol a hefyd (3) ymosodiadau rhywiol heb fod yn dreiddiol ar blant yn y rhestr o droseddau y gellir diddymu rhyddfarnau ar eu cyfer gan Adran Droseddol y Llys Apêl lle ceir tystiolaeth newydd gref?

Ydych chi'n meddwl y dylid cynnwys ymosodiadau rhywiol heb fod yn dreiddiol yn erbyn oedolion a/neu unrhyw droseddau eraill yn y rhestr honno?

“Rhyddfarnau llygredig”

Mae'r gyfraith yn rhyddfarn i euogfarn gael ei diddymu gan yr Uchel Lys pan fo wedi'i "llygru" gan ymyrraeth anghyfreithlon â chwrs cyfiawnder.

Nid yw'r darpariaethau ar gyfer “rhyddfarnau llygredig” prin wedi cael eu defnyddio. Gall hyn fod oherwydd y gofynion cyfreithiol i ddiddymu rhyddfarn fel un wedi'i llygru. Mae'n angenrheidiol bod rhywun yn cael ei erlyn am ymyrryd â chwrs cyfiawnder, ac yn cael ei ddyfarnu'n euog o hynny, a bod y llys lle ceir yr unigolyn hwnnw'n euog a'r Uchel Lys yn canfod y gallai'r ymyriaeth fod wedi effeithio ar ganlyniad y treial cynharach. Credwn fod y gofynion hyn, sy'n fwy beichus na'r rhai sy'n ymwneud ag achosion lle cafodd y diffynnydd ei ryddhau'n briodol ond bod tystiolaeth newydd a chymhellol o euogrwydd, yn adlewyrchu'r ffaith bod y darpariaethau hyn yn ymyrraeth gynnar, a dadleuol, â'r egwyddor o erlyniad dwbl, ac y gallent fod yn atal rhai achosion rhag bod yn destun ail dreial


pan sicrhawyd rhyddfarn drwy ymyrraeth amhriodol â chwrs cyfiawnder. Gallwch ddarllen mwy am y mater hwn ym Mhennod 13 ein papur ymgynghori llawn.

Cyfeiriadau'r Twrnai Cyffredinol ar bwynt cyfreithiol

Pan fydd unigolyn yn cael ei ryddhau mewn treial ar dditiad, gall y Twrnai Cyffredinol gyfeirio ei achos at yr Adran Droseddol y Llys Apêl i egluro pwynt cyfreithiol. Nid yw'r cyfeiriad yn effeithio ar y rhyddfarn. Gallwch ddarllen mwy am ein cynigion dros dro ym Mhennod 13 ein papur ymgynghori llawn. Yn gryno, ymysg pethau eraill, credwn y dylai'r pŵer i wneud cyfeiriadau o'r fath aros a bod yn ddarostyngedig i derfyn amser o 28 diwrnod (gyda'r hawl i wneud cais i wneud cyfeiriad y tu allan i'r cyfnod pan fo hynny er budd cyfiawnder).



Apeliadau i Lys y Goron a'r Uchel Lys mewn achosion diannod



Pan fydd troseddau'n cael eu rhoi ar brawf mewn llys ynadon (boed yn drosedd diannod yn unig neu'n drosedd neillffordd), gelwir y rhain yn achosion diannod. (Mae'r mwyafrif helaeth o ddiffynyddion sy'n blant yn cael eu rhoi ar brawf mewn llysoedd ieuenctid, math o lys ynadon.)

Ar hyn o bryd mae tair ffordd o herio euogfarn neu ddedfryd mewn achos diannod: (1) apêl i Lys y Goron, (2) apêl i'r Uchel Lys ar ffurf "achos wedi'i ddatgan" a (3) cais i'r Uchel Lys am adolygiad barnwrol.



Apêl i Lys y Goron

Yn 2023, o blith ymhell dros filiwn o achosion llysoedd ynadon, gwnaed 5,968 o apeliadau i Lys y Goron.⁶ Mae apeliadau i Lys y Goron yn cynnwys y rhan fwyaf o apeliadau yn erbyn achosion diannod ac mae nifer tebyg o apeliadau euogfarn a dedfryd.

Nid oes angen i'r sawl sydd wedi'i ddyfarnu'n euog gael caniatâd i apelio yn erbyn ei euogfarn (oni bai eu bod wedi pledio'n euog) a/neu ei ddedfryd cyn belled â bod ei apêl yn cael ei gwneud o fewn 15 diwrnod busnes i'w ddedfryd. Ar ôl y pwynt hwnnw, rhaid iddynt wneud cais a chael estyniad amser cyn apelio.

⁶ Criminal court statistics quarterly: Hydref i Rhagfyr 2023

Clywsom bryderon tebyg am y terfyn 15 diwrnod fel gyda'r terfyn 28 diwrnod ar gyfer apeliadau i' Adran Droseddol y Llys Apêl. Credwn y dylai'r terfyn amser fod yr un fath ar gyfer apeliadau i Lys y Goron ag i Adran Droseddol y Llys Apêl. Byddai hyn yn golygu 28 diwrnod neu 56 diwrnod ar hyn o bryd o dan ein newid arfaethedig (gweler Crynodeb o'r Papur Ymgynghori - Cwestiwn 3, uchod).

Cwestiwn Cryno 15:

Ydych chi'n cytuno y dylai'r terfyn amser ar gyfer gwneud apeliadau i Lys y Goron fod yn 56 diwrnod, yr un fath ag yr ydym yn ei gynnig ar gyfer Adran Droseddol y Llys Apêl?

Yn wahanol i Adran Droseddol y Llys Apêl, ailwrandawriad yw apêl Llys y Goron, nid adolygiad, gan farnwr ac (fel arfer) dau ynad. Nid oes angen caniatâd i gyflwyno tystiolaeth newydd neu dystiolaeth nas defnyddiwyd. Gall Llys y Goron gadarnhau neu amrywio penderfyniad llys ynadon, neu ei anfon yn ôl at yr ynadon gyda'i farn. Yn hollbwysig, nid yw'r egwyddor "dim mwy o gosb" yn berthnasol a gall Llys y Goron gynyddu dedfryd ar apêl.

Roedd rhai ymgynghoreion yn dadlau y dylid cyflwyno gofyniad caniatâd ar gyfer apeliadau i Lys y Goron ac y dylai apeliadau o'r fath fod ar ffurf adolygiad o'r gwrandawriad yn y llys ynadon yn hytrach nag ailwrandawriad, efallai'n rhan o ddiwygio ehangach i wneud i ynadon gadw cofnod llawn o wrandawriadau.

Fodd bynnag, dadleuodd llawer yn erbyn yr awgrymiadau hyn. Cawsom dystiolaeth berswadiol, pe bai penderfyniadau ynadon yn agored i gael eu hadolygu fel hyn, y gellid cael effaith niweidiol ar waith y llysoedd hyn drwy fynnu newidiadau mawr mewn ymarfer

(fel cynhyrchu cofnodion swyddogol) ym mhob achos, pan mai dim ond nifer fach iawn o achosion sy'n destun apêl.

Serch hynny, dywedodd rhai y gallai apêl adolygiad fod yn briodol mewn rhai achosion, er enghraifft ar gyfer rhai troseddau rheoleiddio arbenigol sy'n cael eu herlyn fel arfer mewn nifer fach o lysoedd ynadon sydd wedi datblygu arbenigedd yn y materion technegol dan sylw. Awgrymwyd hefyd y gallai disodli apêl drwy ail-wrandawriad gydag adolygiad fod yn briodol ar gyfer achosion cam-drin domestig, lle mae risg benodol y gallai unigolyn apelio yn erbyn ei euogfarn yn y gobaith y bydd y dioddefwr honedig yn amharod i roi tystiolaeth am yr eildro.

Rydym yn fodlon dros dro y dylai'r hawl i ail-wrandawriad a diffyg gofyniad am ganiatâd barhau. Apelir yn erbyn llai nag 1% o euogfarnau llysoedd ynadon, er nad oes gofyniad caniatâd. I'r graddau y gallai fod yn werth gwneud i lysoedd ynadon gofnodi eu hachosion yn swyddogol, credwn fod angen ystyried hyn ar ei delerau ei hun, yn hytrach nag fel rhan o adolygiad o apeliadau troseddol.

Cwestiwn Cryno 16:

Ydych chi'n cytuno y dylid cadw'r hawl i apelio drwy ail-wrandawriad ar ôl euogfarn mewn achos diannod? Ydych chi'n credu y dylid cael gofyniad am ganiatâd a/neu apêl i adolygu troseddau penodol yn unig?

Apêl i'r Uchel Lys

Gall y sawl sydd wedi'i ddyfarnu'n euog, yr erlyniad ac unrhyw un sy'n ddigon cysylltiedig apelio ar sail "achos wedi'i ddatgan" neu wneud hawliad am adolygiad barnwrol i'r Uchel Lys ynglŷn â phenderfyniad llys ynadon. Gellir herio penderfyniadau Llys y Goron sy'n eistedd fel llys apêl o lys ynadon yn yr un modd.

Rhaid i apeliadau a ddatganwyd gan achosion gael eu gwneud o fewn 21 diwrnod i'r penderfyniad yr apelir yn ei erbyn. Mae apeliadau a ddatganwyd gan achosion yn geisiadau'n dechnegol i'r llys ynadon (neu Lys y Goron) i "ddatgan achos" i'r Uchel Lys – hynny yw, i roi crynodeb o'i ganfyddiadau a chyflwyno un neu ragor o gwestiynau cyfreithiol i'r Uchel Lys.

Rhaid hawlio adolygiad barnwrol yn "brydlon" ac o fewn tri mis i'r penderfyniad perthnasol, ond gall yr Uchel Lys ystyried ceisiadau y tu allan i'r cyfnod. Rhaid i'r Uchel Lys roi caniatâd ar gyfer yr hawliad yn gyntaf, a bydd yn gwneud hynny os yw'n un "y gellir ei ddadlau". Mewn hawliad am adolygiad barnwrol, mae'r penderfyniad yn cael ei herio ar sail "cyfraith gyhoeddus" (ymysg pethau eraill, ei fod yn anghyfreithlon, yn afresymol neu'n weithdrefnol wael).

Gellir apelio i'r Goruchaf Lys yn erbyn penderfyniadau'r Uchel Lys mewn apeliadau lle mae'r achos wedi'i ddatgan neu adolygiadau barnwrol.

Clywsom y gallai fod anawsterau wrth sefydlu a ddylid dwyn achos drwy achos datganedig neu adolygiad barnwrol. Clywsom hefyd ei bod yn bwysig cael llwybr o her ar bwynt cyfreithiol yn unig – yn enwedig ar gyfer erlynwyr nad oes ganddynt fel arfer hawl i apelio i Lys y Goron. Credwn y byddai'n fanteisiol symleiddio'r gyfraith yn y maes hwn, ac rydym yn credu ei bod yn well cadw adolygiad barnwrol a diddymu'r

weithdrefn ar gyfer achosion wedi'u datgan. Credwn y gellid delio â heriau sy'n cael eu gwneud ar hyn o bryd drwy gyfrwng achos datganedig drwy adolygiad barnwrol pe bai'r achos datganedig yn cael ei ddiddymu.

Cwestiwn Cryno 17:

Ydych chi'n cytuno y dylid diddymu apêl i'r Uchel Lys drwy achos wedi'i ddatgan, ond y dylid cadw adolygiad barnwrol a sicrhau ei fod ar gael ar gyfer penderfyniadau y mae'n rhaid eu herio ar hyn o bryd drwy achos wedi'i ddatgan?



Apeliadau yng nghwrs achos ac apeliadau eraill

Mae'r rhan fwyaf o'r hawliau apelio yn ymwneud â threialon wedi'u cwblhau ac maen nhw gan ddiffynyddion neu'r erlyniad. Mae lleiafrif yn ymwneud â phenderfyniadau treialon eraill a/neu apeliadau gan drydydd partiön.

Apeliadau yng nghwrs achos

Gall yr amddiffyniad a'r erlyniad apelio yn erbyn penderfyniadau a wneir mewn "gwrandawliadau paratoadol" rhagarweiniol a phenderfyniadau ynghylch mechnïaeth. Yn gyffredinol, nid yw apeliadau interim neu "yng nghwrs achos" yn bosibl, yn bennaf am resymau ymarferol: rhaid gohirio achosion ac fel arfer bydd yn rhaid rhyddhau'r rheithgor, gan arwain at fethiant treial.

Gall yr erlyniad apelio yn erbyn "dyfarniadau terfynu". Mae hyn yn cynnwys dyfarniadau sy'n atal erlyniad yn llythrennol neu'n effeithiol, fel dyfarniad o ddim achos i'w ateb neu ataliad ar sail cam-drin proses. Mae hefyd yn cynnwys dyfarniadau eraill lle mae'r erlyniad yn cytuno, os bydd apêl yn aflwyddiannus, y bydd yn rhoi'r gorau i'r erlyniad.

Rydym yn trafod y mater hwn yn fanylach ym Mhennod 12 y papur ymgynghori llawn. Rydym o'r farn bod caniatáu i'r erlyniad apelio yn erbyn dyfarniadau terfynu yn deg oherwydd bod hawl yr erlyniad i herio dyfarniad terfynu yn cyfateb yn fras i hawl diffynnydd i apelio yn erbyn euogfarn. Fodd bynnag, nid ydym yn credu y byddai'n deg caniatáu i'r erlyniad, ond nid yr amddiffyniad, apelio yn erbyn dyfarniadau nad ydynt yn gwahaniaethu; ac nid ydym yn credu y byddai'n ymarferol caniatáu i'r erlyniad a'r amddiffyniad yr hawl i apelio yn erbyn dyfarniadau o'r fath. Yn y bennod honno, rydym hefyd yn trafod gallu'r erlyniad i apelio yn erbyn penderfyniadau mechnïaeth a phryderon a fynegwyd am y broses ac yn gofyn am eich barn ar y pynciau hyn.



Apeliadau yn erbyn methiant i osod cyfyngiadau adrodd

Un o'r ychydig amgylchiadau lle gall trydydd parti apelio yn erbyn dyfarniad mewn achos troseddol yw pan fo person – cynrychiolydd o'r cyfryngau fel arfer – yn apelio yn erbyn penderfyniad i osod cyfyngiadau adrodd. Un mater a nodwyd gennym yw, er ei bod yn bosibl apelio yn erbyn cyfyngiadau adrodd tra bo treial yn mynd rhagddo, nid yw'n bosibl apelio yn erbyn penderfyniad i beidio â gosod cyfyngiadau.

Fodd bynnag, cawsom dystiolaeth berswadiol y byddai hawl o'r fath yn agored i gael ei chamddefnyddio gan y rhai sy'n ceisio atal adroddiadau am achosion llys. Byddai'n rhaid gadael cyfyngiadau dros dro ar waith nes i'r apêl gael ei chlywed, a allai atal y cyfryngau rhag ymdrin â'r achos, hyd yn oed pe bai'r cyfyngiadau'n cael eu codi wedyn.

Cwestiwn Cryno 18:

A ydych yn cytuno na ddylid cael hawl i apelio yn erbyn (1) gwrthod gosod cyfyngiadau adrodd; neu (2) penderfyniad i godi cyfyngiadau adrodd?

Comisiwn Adolygu Achosion Troseddol

Sefydlwyd y Comisiwn Adolygu Achosion Troseddol gan Ddeddf Apeliadau Troseddol 1995, yn dilyn sawl achos enwog o gamweinyddu cyfiawnder a oedd wedi bod yn destun heriau cyfreithiol dro ar ôl tro. Mae'n gorff annibynnol sy'n ymchwilio i achosion honedig o gamweinyddu cyfiawnder ac yn cyfeirio euogfarnau a dedfrydau yn ôl i'r Adran Droseddol y Llys Apêl neu Lys y Goron.


Mae gan y Comisiwn hefyd bwerau i gynnal ymholiadau, gorfodi cyrff i gyflwyno tystiolaeth iddynt, a chyfeirio cwestiynau i'r Adran Droseddol y Llys Apêl.

Ni fydd y Comisiwn Adolygu Achosion Troseddol yn cyfeirio euogfarn, dedfryd na phenderfyniad arall oni bai:

1. bod posibilrwydd gwirioneddol" na fyddai'r penderfyniad a gyfeiriwyd "yn cael ei gynnal" oherwydd dadl neu dystiolaeth newydd nad yw wedi'i chodi yn yr achos gwreiddiol neu ar apêl; a hefyd
2. bod apêl neu gais am ganiatâd wedi'i benderfynu (er, mewn amgylchiadau eithriadol, gall y Comisiwn Adolygu Achosion Troseddol gyfeirio hyd yn oed pan nad yw unigolyn wedi disbyddu ei hawlau apelio).

Mae llysoedd apêl wedi caniatáu bron i dri rhan o bump o'r 850 o heriau a wnaed drwy ei gyfeiriadau. Roedd rhai ymgylgoreion yn dehongli hyn fel awgrym bod y Comisiwn Adolygu Achosion Troseddol yn gofyn am rywbeth mwy na "posibilrwydd gwirioneddol" cyn y byddai'n cyfeirio achos.

Canlyniad ceisiadau'r Comisiwn, hyd at fis Mawrth 2024



Rydym wedi ystyried sawl beirniadaeth ar arfer y Comisiwn Adolygu Achosion Troseddol a'i ddefnydd o'i bwerau, ond fel corff diwygio'r gyfraith rydym yn canolbwyntio ar y fframwaith cyfreithiol sy'n llywodraethu'r Comisiwn Adolygu Achosion Troseddol.

Mynegwyd pryderon yn gryf i ni, ac yn gynharach i Bwyllgor Cyfiawnder Tŷ'r Cyffredin a Chomisiwn San Steffan ar Gamweinyddiadau Cyfiawnder, ynghylch natur "ragfynegol" y prawf "posibilrwydd gwirioneddol". Y broblem ymddangosiadol yw bod y Comisiwn Adolygu Achosion Troseddol yn asesu'r posibilrwydd y bydd y llys apêl yn cynnal y penderfyniad, yn hytrach nag yn asesu'r posibilrwydd bod y penderfyniad yn gywir, yn anghywir, yn ddiogel neu'n anniogel. Roedd 34 o'r 35 a ymatebodd i gwestiwn ein Papur Materion ar y prawf "posibilrwydd gwirioneddol" yn credu ei fod yn llesteirio cywiro camweinyddiad cyfiawnder.

Canfu'r adolygiad gan Chris Henley CB o'r modd yr ymdriniodd y Comisiwn Adolygu Achosion Troseddol â cheisiadau Andrew Malkinson fod y Comisiwn Adolygu Achosion Troseddol wedi canolbwyntio'n ormodol ar y rhesymau pam yr oedd yr Adran Droseddol y Llys Apêl wedi gwrthod ei apêl yn flaenorol (pan nad oedd tystiolaeth DNA gerbron yr Adran Droseddol y Llys Apêl) ac wedi methu â gwerthfawrogi arwyddocâd tystiolaeth DNA newydd er diogelwch ei euogfarn.

Rydym wedi ein hargyhoeddi dros dro y dylai'r prawf presennol gael ei ddisodli gan un nad yw'n rhagfynegi. Awgrymwyd profion amgen, rhai'n seiliedig ar brofion mewn gwledydd eraill, megis a allai: camweinyddiad cyfiawnder fod wedi digwydd; y byddai er budd cyfiawnder i wneud cyfeiriad; bod seiliau dadleuol dros apelio; neu a yw penderfyniad yn anniogel neu a allai fod.

Cwestiwn Cryno 19:

Ydych chi'n cytuno y dylai'r prawf "posibilrwydd gwirioneddol" a ddefnyddir gan y Comisiwn Adolygu Achosion Troseddol ar gyfer cyfeirio euogfarnau gael ei ddisodli gan brawf nad yw'n rhagfynegol? Oes gennych chi awgrymiadau neu ddadleuon dros brofion eraill nad ydynt yn rhagfynegol?

Camweinyddu cyfiawnder yn systemig

Dim ond dwy enghraifft yw achosion Swyddfa'r Post Horizon a Ridgewell o gamweinyddu cyfiawnder sydd wedi digwydd eang. Yn y Papur Ymgynghori rydym yn ystyried nifer o achosion eraill lle mae problemau systemig wedi cael eu datgelu, gan gynnwys achosion eraill o gamymddwyn sefydliadol gan yr heddlu, yn ogystal â methiant mewn labordai profi, ac achosion "syndrom ysgwyd babi". Gwelsom fod y prosesau a fabwysiadwyd ar gyfer adolygu erlyniadau i ganfod achosion posibl o gamweinyddu cyfiawnder yn rhai ad hoc ac yn anghyson.

Roedd Deddf 2024 yn diddymu euogfarnau Horizon Swyddfa'r Post yn un eithriadol, ond un rheswm sylweddol dros ei chyflwyno oedd er mwyn cyflymu proses hir a drud o adolygu euogfarnau. Roedd ofn bod arfer presennol y Comisiwn Adolygu Achosion Troseddol, sy'n dibynnu ar y sawl a euogarnwyd neu ei gynrychiolwyr yn bwrw ymlaen ag apêl ar ôl i'r achos gael ei gyfeirio, yn annigonol pan fyddai rhai o'r bobl a gafwyd yn euog ar gam yn methu neu'n anfodlon ymgysylltu â'r broses.

Credwn fod achos cryf, pan fydd problemau fel y rhain yn codi, fod y Comisiwn Adolygu Achosion Troseddol, fel rhan o'i swyddogaeth ymchwilio, yn cynnal neu'n goruchwyllo ymchwiliad i'r achosion hyn o gamweinyddu cyfiawnder yn systematig, gan ei bod yn debygol y bydd modd trosglwyddo ymchwiliadau, technegau gwerthuso a data a gesglir ar draws achosion.

Cwestiwn Cryno 20:

Ydych chi'n cytuno, lle ceir tystiolaeth o broblem eang sy'n cwestiynu diogelwch euogfarnau, y dylai'r Comisiwn Adolygu Achosion Troseddol fel arfer gynnal adolygiad ohonynt, gan ddefnyddio ei bwerau ymchwilio yn ôl yr angen? Oes gennych chi farn ar fesurau eraill a allai alluogi cywiro mwy nag un achos o gamweinyddu cyfiawnder yn effeithlon lle ymchwilir i faterion systemig?

DS Derek Ridgewell

Roedd Derek Ridgewell, un o swyddogion Heddlu Trafnidiaeth Prydain yn y 1970au, ac aelodau o'i garfan, wedi fframio dynion diniwed, llawer ohonynt o leiafrifoedd ethnig, am droseddau o ladrad, dwyn a throseddau a chynllwynion cysylltiedig. Roedd y rhain yn cynnwys pedwar dyn du a arestiwyd yng ngorsaf tanddaearol Oval (Pedwar Oval) a chwe dyn du a arestiwyd pan honnodd Ridgewell ei fod ef ei hun wedi dioddef ymosodiad gyda'r bwriad o ddwyn yng ngorsaf

Stockwell (Chwech Stockwell) ill dau yn 1972.

Ym 1973, arestiwyd dau ddyn du gan Ridgewell yng ngorsaf Tottenham Court Road. Methodd eu treial pan ddaeth i'r amlwg eu bod yn fyfyrwyr o Gymdeithas yr Iesuwyd ar eu ffordd i gwrs hyfforddi ym Mhrifysgol Rhydychen.

Cafodd Ridgewell ei symud i dîm newydd a oedd yn ymchwilio i achosion o ddwyn post. Yn wir, trefnodd ladradau, a chamgyhuddo pobl ddiniwed am y troseddau. Yn 1980, cafodd ef a dau swyddog arall eu carcharu am ddwyn nwyddau gwerth tua £364,000. Cafodd ei ddedfrydu i saith mlynedd o garchar, ond bu farw ar ôl dwy flynedd.

Er gwaethaf euogfarn Ridgewell, nid oedd euogfarnau llawer o ddioddefwyr ei gynllwyniau wedi cael eu cyfeirio gan yr awdurdodau na'u diddymu nes i'r Comisiwn Adolygu Achosion Troseddol fynd ati y 2018 i gyfeirio euogfarn Stephen Simmons o 1975 am ddwyn post. Roedd Mr Simmons wedi dysgu am hanes Ridgewell ar hap yn 2013. Gwnaeth gais i'r Comisiwn Adolygu Achosion Troseddol, a gyfeiriodd ei euogfarn at yr Adran Droseddol y Llys Apêl. Arweiniodd hyn at y Comisiwn Adolygu Achosion Troseddol yn cyfeirio euogfarnau Chwech Stockwell a Phedwar Oval. Yn 2023, cyfeiriodd euogfarnau Basil Peterkin a Saliah Mehmet ar ôl eu marwolaeth, sef dau weithiwr rheilffordd a oedd wedi cael eu dyfarnu'n euog o ddwyn post. Cafodd yr holl euogfarnau eu diddymu.

Apeliadau i'r Uchel Lys

Gall yr amddiffyniad a'r erlyniad geisio apelio yn erbyn achos ar ôl i'r Uchel Lys neu Adran Droseddol y Llys Apêl, yn ôl y digwydd, benderfynu ar apêl.

Fel gydag apeliadau mewn achosion sifil, mae apeliadau o'r Uchel Lys neu'r Adran Droseddol y Llys Apêl mewn achosion troseddol yn gofyn am ganiatâd gan yr Uchel Lys neu'r Adran Droseddol y Llys Apêl, neu gan y Goruchaf Lys ei hun. Fodd bynnag, yn wahanol i apeliadau sifil, ni ellir rhoi caniatâd oni bai fod yr Uchel Lys neu Adran Droseddol y Llys Apêl wedi ardystio bod pwynt cyfreithiol o bwysigrwydd cyhoeddus cyffredinol yn rhan o'r penderfyniad.

Mae rhai wedi cwestiynu'r Goruchaf Lys am ddiffyg profiad troseddol arbenigol, yn enwedig o'i gymharu â'r Adran Droseddol y Llys Apêl. Mae Llywydd y Goruchaf Lys wedi anghytuno'n gryf â hyn, ac wedi nodi, yn ogystal ag apeliadau o'r Adran Droseddol y Llys Apêl a'r Uchel Lys, fod y Goruchaf Lys yn aml yn delio â materion cyfraith droseddol pan fydd yn ystyried achosion sifil neu pan fydd ustusiaid y Goruchaf Lys yn eistedd fel aelodau o Bwyllgor Barnwrol y Cyfrin Gyngor.

Mae apeliadau i'r Goruchaf Lys yn cyflawni dibenion pwysig o ddatblygu'r gyfraith gyffredin, gan gywiro gwallau tybiedig a wneir gan lysoedd isod a chysoni gwrthdaro rhwng cyfraith droseddol a chyfraith sifil. Roedd y rhan fwyaf o'r rhai a ymatebodd i'n Papur Materion yn credu bod y gofynion ardystio presennol yn cyfyngu'n ormodol ar achosion sy'n cyrraedd y Goruchaf Lys. Nid yw awdurdodaethau tebyg i'n hawdurdodaeth ni yn gofyn am ardystiad gan lys is i'w goruchaf lysoedd wrando apeliadau troseddol, ac rydym o'r farn y byddai'r gofyniad ar wahân i gael caniatâd i apelio i'r Goruchaf Lys yn atal nifer yr apeliadau o'r Goruchaf Lys rhag bod yn llethol. O'r herwydd, credwn mai'r Goruchaf Lys ddylai gael y gair olaf ynghylch pa achosion y mae'n gwrando arnynt.

Cwestiwn Cryno 21:

Ydych chi'n cytuno y dylai'r Goruchaf Lys allu caniatáu hawl i apelio o achos troseddol Adran Droseddol y Llys Apêl neu'r Uchel Lys os yw'n fodlon bod yr apêl yn ymwneud â mater o gyfraith sydd o bwysigrwydd cyhoeddus cyffredinol?



Cadw a datgelu tystiolaeth ar ôl y treial



Gall tystiolaeth heb ei defnyddio a/neu heb ei datgelu fod yn ganolog i apêl, yn enwedig os daw ei defnyddioldeb neu berthnasedd yn amlwg flynyddoedd yn ddiweddarach o ganlyniad i ddatblygiadau

gwyddonol, technegau tystiolaeth neu wybodaeth newydd arall. Yn yr un modd, pan fydd tystiolaeth o'r fath yn cael ei chuddio neu ei dinistrio, gall fod yn amhosibl profi nad yw euogfarn unigolyn dieuog yn ddiogel. Canfu ein hymchwili fod y gyfraith bresennol sy'n rheoli'r broses o gadw a datgelu tystiolaeth ar ôl treial yn ddamweiniol, yn cael ei chamddeall a'i chamgymhwyso, a allai lesteirio cywiro camweinyddiad cyfiawnder. Er enghraifft, cafodd yr arddangosion yn achos Andrew Malkinson eu colli neu eu dinistrio gan yr heddlu, a dim ond lwc dda oedd bod samplau fforensig a gymerwyd o'r arddangosion hynny wedi cael eu cadw ar ôl iddynt gael eu profi gan y Gwasanaeth Gwyddoniaeth Fforensig fel rhan o adolygiad cynharach (nad oedd wedi arwain at ganlyniadau defnyddiol ar y pryd).

Ar hyn o bryd, dylid cadw deunydd a allai fod yn berthnasol i ymchwiliad i droseddu person a gafwyd yn euog hyd nes y caiff ei ryddhau o'r ddalfa (neu am chwe mis ar ôl ei gael yn euog os na roddir dedfryd o garchar). Un mater yw bod y cyfnod hwn bron bob amser yn fyrrach na dedfryd yr unigolyn: efallai y bydd yn cael ei ryddhau ar drwydded pan fydd yn cyrraedd 40%, hanner ffordd neu ddwy ran o dair yn ei ddedfryd, neu ar ôl i'w "gyfnod sylfaenol" ddod i ben ar gyfer dedfrydau oes, ond wedyn yn cael ei alw'n ôl i'r carchar am dorri telerau ei drwydded.

Mae hyd y cyfnod cadw hefyd wedi cael ei gwestiynu mewn oes ddigidol neu yng nghyd-destun penodol troseddwr sy'n blant, nad ydynt efallai'n gweld brys na phwysigrwydd apelio yn erbyn eu heuogfarn cyn wynebu canlyniadau hynny pan fyddant yn oedolion. Rydym wedi cael ein darbwyllo gan y beirniadaethau hyn, ond rydym yn cydnabod y baich llethol posibl o gadw unrhyw dystiolaeth neu'r rhan fwyaf o dystiolaeth yn barhaol.

Gallwch ddarllen mwy am y mater hwn ym Mhennod 15 y papur ymgynghori llawn, gan gynnwys ein cynnig dros dro y dylid cadw trawsgriadau a recordiadau sain o dreialon am gyfnod llawn dedfryd unigolyn o leiaf pan gaiff ei ddedfrydu i garchar.

Cwestiwn Cryno 22:

Ydych chi'n cytuno y dylid ymestyn cyfnodau cadw ar gyfer tystiolaeth i gynnwys o leiaf gyfnod llawn dedfryd unigolyn? Oes gennych chi farn ynghylch a ddylid ymestyn cyfnodau cadw ymhellach?

Mynegwyd pryderon ynghylch dinistrio tystiolaeth yn fwriadol neu'n fyrbwyll yn gynamserol. Er y gallai swyddog sy'n dinistrio neu'n cuddio tystiolaeth yn fwriadol gael ei gosbi o dan y troseddau o wyrddroi cwrs cyfiawnder neu gamymddwyn mewn swydd gyhoeddus, nid yw dinistrio tystiolaeth oherwydd esgeulustod difrifol neu fyrbwylltra yn cael ei droseddoli'n benodol.

Cwestiwn Cryno 23:

Ydych chi'n cytuno y dylai dinistrio, gwaredu neu gelu tystiolaeth a gedwir heb awdurdod fod yn drosedd benodol? Oes gennych chi farn am gwmpas trosedd o'r fath?

Roedd rhai ymgynghoreion hefyd yn dadlau y byddai'n well pe bai'r cyfrifoldeb dros gadw tystiolaeth yn yr hirdymor yn cael ei drosglwyddo o'r heddlu i gyfleuster annibynnol arbenigol.

Cwestiwn Cryno 24:

Ydych chi'n credu y dylai'r cyfrifoldeb dros storio tystiolaeth ffforensig yn yr hirdymor gael ei drosglwyddo i Wasanaeth Archif Fforensig cenedlaethol ac a oes gennych farn ar bar mor fforddiadwy ac ymarferol fyddai hynny?

Datgelu a chael gafael ar dystiolaeth ar ôl y treial

Roedd y Goruchaf Lys, yn yr achos arweiniol *Nunn*,⁷ o'r farn nad yw'r egwyddor o degwch yn gofyn am yr un lefel o ddatgelu ar ôl euogfarn ag yr oedd cyn ac yn ystod y treial.

Mae rhai ymgynghoreion wedi beirniadu cwmpas y dyletswyddau yn achos *Nunn*. Pryder ehangach yw bod achos *Nunn* yn cael ei gamgymhwyso gan gyrff cyhoeddus. Dywedodd ymgynghoreion wrthym y dibynnir ar achos *Nunn* i wrthod datgelu a'i fod yn cael ei gamddechongli fel hawl fach iawn ar gyfer datgelu ar ôl euogfarn.

Roedd pobl eraill yn cwestiynu'r rhagdybiaeth yn achos *Nunn* bod y Comisiwn Adolygu Achosion Troseddol yn opsiwn "wrth gefn" effeithiol os yw'r heddlu neu Wasanaeth Erlyn y Goron yn gwrthod datgelu. Maent yn dadlau dros hawl gyfreithiol i gael mynediad i ffeiliau'r heddlu a'r erlyniad ac ymchwilio iddynt, a dyletswydd i gadw tystiolaeth a rhoi gwybod i ddiffynyddion am eu gallu i herio'r broses o ddinistrio ffeiliau. Gall darllenwyr weld y drafodaeth lawn ar y materion hyn ym Mhennod 15 ein Papur Ymgynghori llawn.

⁷ *R (Nunn) v Chief Constable of Suffolk* [2014] UKSC 37, [2015] AC 225.

Yn y crynodeb hwn, rydym yn gofyn am fynediad newyddiadurwyr at dystiolaeth a allai arwain at gywiro camweinyddiad cyfiawnder. Mae pwysigrwydd newyddiaduraeth ymchwiliol wrth ddatgelu camweinyddiadau cyfiawnder yn cael ei amlygu'n dda. Mae'r rhaglenni *Rough Justice* (BBC, 1982-2007) a *Trial and Error* (Channel 4, 1992-2000) wedi helpu i wrthdroi euogfarnau llawer o bobl a gafwyd yn euog ar gam. Yn yr un modd, gall newyddiaduraeth hirdymor neu bwnc-benodol, fel un *Computer Weekly* wrth ddatgelu'r gwallau yn system Horizon Swyddfa'r Post, gynnal pwysu neu ddiddordeb cyhoeddus mewn achosion honedig o gamweinyddu cyfiawnder. Mae gallu newyddiadurwyr i gael gafael ar dystiolaeth nad yw ar gael i'r cyhoedd wedi chwarae rhan hollbwysig yn eu gwaith o ddatgelu achosion o gamweinyddu cyfiawnder.

Fodd bynnag, yn yr oes fodern, mae'r llinell rhwng newyddiaduraeth prif ffrwd a mathau eraill o gyfathrebu yn llawer llai clir. Mae anawsterau amlwg o ran caniatáu datgelu deunydd (er enghraifft, sy'n destun cyfyngiadau adrodd neu sy'n cynnwys gwybodaeth gyfrinachol) i "newyddiadurwyr sy'n ddinasyddion", fel blogwyr, nad ydynt wedi cael hwwyforddiant proffesiynol nac yn atebol, ac nad ydynt efallai'n deall nac yn dilyn cyfyngiadau cyfreithiol ar sut i'w ddefnyddio.

Cwestiwn Cryno 25:

Ydych chi'n credu y gellid ac y dylid gwneud darpariaeth i alluogi datgelu deunydd at ddibenion newyddiaduraeth gyfrifol i ddatgelu achosion posibl o gamweinyddu cyfiawnder?



lawndal a chymorth i ddiodefwyr camweinyddiad cyfiawnder

Pan fydd unigolyn dieuog wedi'i gael yn euog ar gam, mae achos cryf dros ryw fath o iawn i'w ddigolledu. Gall euogfarn achosi niwed sylweddol, yn enwedig lle bu colli rhyddid, gan gynnwys niwed i enw da a cholled ariannol. Fel parti i'r Comisiwn Adolygu Achosion Troseddol, mae'n rhaid i'r DU roi iawndal i ddiodefwyr camweinyddu cyfiawnder mewn rhai amgylchiadau.

Fodd bynnag, mae'r cynllun iawndal presennol yn dilyn euogfarn anghyfiawn yn gosod trothwy uchel iawn. Dan adran 133 Deddf Cyfiawnder Troseddol 1988, rhaid i unigolyn fod wedi cael ei euogfarn wedi'i gwrthdroi neu ei maddau oherwydd ffaith newydd neu ffaith sydd newydd gael ei darganfod ac sy'n dangos, y tu hwnt i amheuaeth resymol, fod camweinyddu cyfiawnder wedi digwydd.


Yn 2014, cafodd y cynllun ei gyfyngu ymhellach fel nad yw iawndal ond yn cael ei ddyfarnu "os, a dim ond os yw'r ffaith newydd neu'r ffaith sydd newydd ei darganfod yn dangos y tu hwnt i amheuaeth resymol nad oedd y person wedi cyflawni'r drosedd". Mae cap hefyd ar iawndal sy'n daladwy: uchafswm yr iawndal ar gyfer rhywun sydd wedi cael ei gadw am o leiaf 10 mlynedd yw £1 miliwn a'r uchafswm mewn unrhyw achos arall yw £500,000.

Credwn fod y gofyniad i brofi dieuogrwydd y tu hwnt i amheuaeth resymol yn gwrthdaro ag egwyddorion sylfaenol cyfraith sifil a throseddol. Mewn achosion troseddol, mater i'r erlyniad yw profi ei fod yn euog i'r safon droseddol (fel bod y rheithgor yn "sicr", neu y "tu hwnt i amheuaeth resymol"); lle mae'r baich ar y diffynnydd i brofi rhyw fater, nid yw'r safon byth yn uwch na'r tebygolrwydd. Mewn achosion sifil (fel y rhan fwyaf o hawliadau am iawndal), pan fydd parti'n ysgwyddo'r baich o brofi rhywbeth, y safon prawf yw'r tebygolrwydd. Rydym yn credu y gallai'r gyfraith fethu â chyflawni rhwymedigaethau'r DU o dan y Confensiwn Rhyngwladol ar Hawliau Sifil a Gwleidyddol.

Cwestiwn Cryno 26:

Ydych chi'n cytuno na ddylai'r prawf ar gyfer iawndal yn dilyn euogfarn anghyfiawn ei gwneud yn ofynnol i unigolyn sydd wedi'i ryddhau o fai ddangos, y tu hwnt i amheuaeth resymol, ei fod yn ffeithiol ddieuog? Ydych chi'n cytuno y dylai iawndal fod yn daladwy pan fydd yr unigolyn yn gallu dangos ar sail tebygolrwydd ei fod yn ffeithiol ddieuog? Ydych chi'n meddwl y byddai prawf gwahanol yn fwy priodol?

Iawndal a ddyfarnwyd neu a dalwyd mewn gwirionedd fesul blwyddyn mewn⁸



⁸ Mae'r ffigurau rhwng 1999/2000 a 2019/2020 yn dangos faint o iawndal a ddyfarnwyd i ymgeiswyr llwyddiannus yn y flwyddyn honno: Jon Robbins, "Mae'r Weinyddiaeth Gyfiawnder wedi talu llai na £1.5m o iawndal i ddioddefwyr camweinyddu cyfiawnder mewn tair blynedd", *The Justice Gap* (5 Medi 2023), <https://www.thejusticegap.com/moj-has-paid-out-less-than-1-5m-in-compensation-to-victims-of-miscarriages-of-justice-in-seven-years/>. Mae ffigurau o 2020/2021 i 2023/24 yn cynrychioli'r taliadau a wnaed mewn gwirionedd yn y flwyddyn honno: Ministry of Justice, "Miscarriage of Justice Application Service (MOJAS) Claims, England and Wales, April 2016/17 to March 2023/24" (25 Ebrill 2024), https://assets.publishing.service.gov.uk/media/66292a41b0ace32985a7e7c9/MOJAS_tables.ods.

Apeliadau gan blant a phobl ifanc

Mae'r system cyfiawnder troseddol yn trin plant⁹ yn wahanol i oedolion. Mae hyn yn cydnabod gwahanol anghenion plant yn ogystal â'u beusrwydd llai oherwydd emosiynol. Mae'r rhan fwyaf o'r plant sy'n dod o fewn y system cyfiawnder troseddol yn cael eu trin mewn llysoedd ieuencid sy'n fath o lys ynadon. Felly, mae'r llwybr apêl ar gyfer plant yr un fath â'r rhai o lysoedd ynadon ac mae'n cynnwys hawl i ail-wrandawriad yn Llys y Goron, achos datganedig i'r Uchel Lys neu her drwy adolygiad barnwrol i'r Uchel Lys.

Mae canlyniadau sylweddol pan fydd plentyn yn cyrraedd 18 oed ac yn cael ei ystyried a'i drin fel oedolyn i raddau helaeth. Fodd bynnag, mae'r Llysoedd hefyd yn cydnabod bod pobl ifanc yn dal i aeddfedu ar ôl cyrraedd 18 oed.

Mae troi'n 18 oed yn effeithio ar guddio enw'r diffynnydd. Dan Ddeddf Plant a Phobl Ifanc 1933 mae cyfyngiadau adrodd awtomatig ar achosion sy'n ymwneud â phlant oni bai fod y Llys yn hepgor y cyfyngiadau hyn os ystyrir bod hynny er budd y cyhoedd. Rydym wedi cael tystiolaeth bod rhai pobl ifanc yn cael eu darbwyllo i beidio ag apelio yn erbyn eu dedfryd neu eu heuogfarn lle maent wedi troi, neu ar fin troi, yn 18 oed ac, er bod eu hachos wedi bod yn destun cyfyngiadau adrodd, ni fyddai'r apêl yn destun i hynny. Rydym yn derbyn y gallai hyn atal apeliadau teilwng. Fodd bynnag, rydym hefyd yn cydnabod, lle mae cuddio enw eisoes wedi methu (er enghraifft, lle mae barnwr y treial wedi caniatáu i'r troseddwr gael ei enwi), na fyddai cyfiawnhad dros gyfyngu ar adrodd am apêl.

Cwestiwn Cryno 27:

Ydych chi'n cytuno, pan fydd unigolyn wedi'i gael yn euog fel plentyn ac nad yw cuddio ei enw wedi methu am reswm arall, y dylai'r unigolyn hwnnw aros yn ddiennw yn ystod ei apêl?

Cadw tystiolaeth

Credwn fod y cyfnodau cadw presennol yn annigonol i blant. Y rheswm am hyn yw efallai nad yw plant yn deall y broses cyfiawnder troseddol yn iawn, na chanlyniadau tymor hir euogfarn. Cawsom dystiolaeth hefyd y gallai plant ddod dan bwysau gan rieni neu bobl eraill i bledio'n euog. Yn ei dro, gall hyn olygu y gallai plant fod yn fwy tebygol o gyflwyno apeliadau'n nes ymlaen mewn bywyd ond eu bod wedyn yn cael eu llesteirio'n ormodol yn sgil colli neu ddinistrio tystiolaeth. Felly, rydym wedi dod i'r casgliad y dylid ymestyn cyfnodau cadw ar gyfer plant yn benodol.

Cwestiwn Cryno 28:

Ydych chi'n cytuno, ar gyfer plant, y dylid ymestyn y cyfnod cadw ar gyfer tystiolaeth hyd at ddiwedd eu dedfryd neu chwe blynedd ar ôl iddynt droi'n 18 oed, pa un bynnag sydd hiraf?

9 Er y gellir defnyddio termau gwahanol mewn deddfwriaeth, yma rydym yn cyfeirio at bawb o dan 18 oed fel 'plant.' Mae hyn yn unol â Chonfensiwn y Cenhedloedd Unedig ar Hawliau'r Plentyn, sy'n datgan bod pawb dan 18 oed yn blentyn, oni bai fod cyfraith genedlaethol yn darparu ar gyfer oedran llai ar gyfer bod yn oedolyn (yng Nghymru a Lloegr, 18 oed yw oedran oedolyn).

Effeithiau ar grwpiau penodol

Yn ogystal â'r effeithiau posibl rydym wedi'u nodi'n gynharach yn y crynodeb hwn (ar bobl ifanc, dynion a menywod du ifanc yn bennaf), rydym yn ymwybodol nad ydym wedi rhoi sylw i rai grwpiau penodol neu effeithiau penodol nac wedi cael gwybod amdanynt wrth baratoi ein papur ymgynghori, ac rydym am glywed am enghreifftiau neu themâu sy'n ymwneud ag effeithiau ar grwpiau penodol neu effeithiau croestoriadol (effeithiau sy'n deillio o fwy nag un nodwedd). Gallwch ddarllen mwy am effeithiau ehangach ym Mhennod 17 ein papur ymgynghori llawn.

Er ein bod eisiau clywed am effeithiau ar unrhyw grŵp neu nodwedd, mae Deddf Cydraddoldeb 2010 yn nodi naw "nodwedd warchodedig": oedran; anabledd; ailbennu rhywedd; priodas a phartneriaeth sifil; beichiogrwydd a mamolaeth; hil; crefydd neu gred; rhyw; a chyfeiriadedd rhywiol.

Cwestiwn Cryno 29:

Rhowch wybod i ni os ydych chi'n credu neu os oes gennych dystiolaeth neu ddata i awgrymu y gallai ein cynigion dros dro a'n cwestiynau agored arwain at fanteision neu anfoneision i grwpiau penodol neu'n seiliedig ar nodweddion penodol (gan roi sylw penodol i oed, anabledd, ailbennu rhywedd, priodas a phartneriaeth sifil, beichiogrwydd a mamolaeth, hil, crefydd neu gred, rhyw a chyfeiriadedd rhywiol).



